

A stylized illustration of a girl in a grey dress and orange boots holding a large blue globe. The globe is surrounded by green leaves and a blue bird perched on a branch. The title 'حواديت قبل النوم' is written in red Arabic script across the globe.

حواديت قبل النوم

تأليف

شهرزاد الأطفال / شيماء عبد العال

iCulture

Empowering creative minds

حدوتة (1) جسمي بتاعي أنا وبس

الهدف منها توعية الأطفال للحفاظ على أنفسهم من خطر التحرش الجنسي

كان يا ما كان .. كان في زمان .. بنت جميلة اسمها جاسمين .. كانت جاسمين بنت شاطرة ونشيطة ويتسمع كلام مامتها .. وفي يوم من الأيام مامتها قالت لها: أنتي كبرتي دلوقتي يا جاسمين وبقي عندك ثلاث سنين وفي شوية حاجات لازم تعرفيها كويس .. ردت جاسمين: قولي يا ماما أنا سمعكي .. قالت لها بصي يا جاسمين .. جسم كل واحد فينا بتاعه هو وبس .. ومش من حق أي حد أنه يحط أيده على جسم الثاني.

سألت جاسمين مامتها يعني يا ماما جسمي بتاعي أنا وبس .. قالت لها طبعاً يا جاسمين والكلام دة للولد وللبنات بردو .. وعلشان كدة ما ينفعش أي حد يشوف جسمك غير مامتك بس .. ولما تدخلتي التواليت لازم تقفلي الباب عليكي .. ولو أي حد عايز يسلم عليكي ويبوسك حتي ولو من قرايبنا .. يبوسك من خدك بس غير كدة يبقى غلط .. وكمان مينفحش تقعد على رجل حد خالص .. أحنا خالص كبرنا .. وما نغيرش هومنا قدام حد تماماً.

وفي أماكن معينة في جسمنا ما ينفعش حد يجي جنبها أبداً أبداً .. سألت جاسمين مامتها وفين هي الأماكن دي يا ماما؟؟ جابت مامتها عروسة من بتوع جاسمين وشرحت لها الأماكن دي فين بالظبط .. وقالت لها دة بالنسبة للبنات .. أما الولد فالجزء اللي بيغطيه بالمايوه.

كانت جاسمين قاعدة بتسمع لكلام مامتها ومركزة جداً .. وبعد ما مامتها خلصت كلامها .. قالت لها طيب ولو حد حط أيده على جسمي أعمل أيه وأتصرف إزاي؟؟ .. قالت لها بصي يا جاسمين لو حد حط أيده على جسمك أو عمل حركة ضايقتك من اللي قولت لك عليها لازم ما تسكوتيش .. وتزقي أيده وتجري بسرعة لبعيد وتيجي تقولي لماما أو لبابا على طول وأحنا ها نعرف نتصرف إزاي.

ولو كنا بعيد عنك صرخي بصوت عالي أوي وسمعي كل اللي حواليك وساعتها هو ها يخاف ويبعد .. قالت لها جاسمين: حاضر يا ماما .. وأي حاجه تحصل لازم تحكي عليها لماما أول بأول .. محدش يقولك دة سر بيني وبينك أو ما تقوليش لمامتك .. لأن مفيش بنت أو ولد شاطرين يخبوا أي حاجة عن مامتهم.

جاسمين سمعت كلام مامتها ووعدها بأنها تنفذه .. وبالفعل في يوم من الأيام جالهم ناس قرايبهم عشان يزورهم .. وهما عندهم جاسمين غصب عنها أتدلق عليها كوباية العصير وهي بتشربها .. دخلت جاسمين أوضتها عشان تغير هدمها اللي إتبلت وقفلت الباب عليها.

و فجأة .. لاقيت حد من قرايبها يفتح باب الأوضة من برة عليها .. قعدت جاسمين تصرخ بصوت عالي وتنده على مامتها: يا ماما .. يا ماما .. يا ماما

مامتها جت بسرعة وقفلت الباب عليها .. قرايبهم اعتذر لها جداً .. وقال لها أنه ماكنش يعرف أنها في الأوضة بتغير هدمها وأكد لها انه ماكنش يقصد .. مامتها فرحت جداً بيها لأنها أتصرفت صح زي ما اتفقوا مع بعض، وقالت لها برفو يا جاسمين .. إنتي اتصرفتي صح .. إنتي بنت شاطرة .. لان جسمك بتاعك إنتي وبس وما ينفعش أي حد غير ماما يشوفه.

حدوتة (2) أخوات القرد كمون

الهدف منها زرع الحب بين الأخوات

كان يا ما كان .. كان في زمان .. قرد شقي جداً اسمه كمون .. كان كمون عنده أخت اسمها شطة وأخ اسمه ليمون .. كان كمون أكبر واحد في أخواته .. بس المشكلة أنه بدل ما يخلي باله من أخواته الصغيرين .. كان هو اللي بيضربهم ويأذيهم دائماً.

مرة مثلاً زق أخته شطة فجأة وهي مش واخدة بالها من على فرع الشجرة وقعت على الأرض وأتورت في رجليها .. كمون كان فاكّر نفسه كدة بيهزر معاهم وبيقعد يضحك كمان .. وكل مرة كان مامته وباباه بيزعقوا له ويقولوا له: يا كمون يا حبيبي دول أخواتك الصغيرين وبيحبوك وأنت كمان المفروض تحبهم وتخاف عليهم وتخلي بالك منهم لو قرد غريب ضايقهم أو زعلهم مثلاً .. لأنك أخوهم الكبير .. مش أنت اللي تضربهم وتأذيهم .. وهو يوعدهم أن مش ها يعمل كدة تاني .. وما يعديش يومين ويعمل كمون كارثة جديدة .. دايمًا يعمل مشاكل مع أخواته ويضربهم .. بسبب أو من غير سبب.

في يوم من الأيام كان أخوه الصغير ليمون بيلعب بحبل صغير وربطه زي المرجيحة كدة بين فروع الشجر وبيتمرجح ومبسوط .. وفجأة فك كمون طرف الحبل المربوط .. ووقع القرد ليمون على الأرض وأتخبط جامد في رأسه وأتور جرح كبير أوي .. وأغمي عليه .. أتخض كمون وجري بسرعة على أخوه .. لاقى في جرح كبير في رأسه وبينزف دم كثير وبقي مش عارف يعمل إيه .. بقي ها يتجنن .. بقي يجري في الغابة ويخبط على بيوت الحيوانات علشان يلحقوا أخوه .. ويصرخ بصوت عالي .. إلحقوا أخويا ليمون .. أخويا ها يموت .. إلحقوا أخويا .. لحد ما وصل عند مامته وباباه حكى لهم علي اللي عمله.

باباه ومامته جريوا بسرعة عند أخوه وحاولوا يفوقوه ونظفوا الجرح وربطوه .. وكمون بقي واقف يعيط ويعتذر لأخوه ويقول له سامحني يا ليمون سامحني يا أخويا .. أنا أسف .. أنا غلط غلطة كبيرة .. أنا كنت بحب دايمًا أضايقك أنت وشطة أختي وأضربكم .. لكن ما كنتش أعرف أن ممكن الموضوع يوصل لكدة .. أنا بحبكم جداً والله .. وكنت ها تجنن لما أتورت بسببي .. وأوعدكم إني بعد كدة مش همد أيدي عليكم تاني أبدًا .. وها خلي بالي منكم .. لأنكم إخواني الصغيرين وها نلعب مع بعض ونتنطط مع بعض على الشجر ومش ها أضايقكم تاني أبدًا.

حدوتة (٣) يامن وجيرانه

الهدف منها توعية الأطفال بحقوق الجار

كان يا ما كان .. كان في زمان .. ولد اسمه يامن .. كان يامن ولد جميل ومؤدب وبيحب باباه أوي .. وفي يوم وهو رايح مع باباه المسجد يصلوا العشاء قابلهم على السلم عمو حسام جارهم .. سلم يامن وباباه عليه .. وبعدين طلب عمو حسام من بابا يامن أنه يسلفه مبلغ من المال لأنه محتاجه جداً ووعد أنه هيرده له في بداية الشهر.

وافق باباه من غير تفكير وطلع المبلغ لعمو حسام .. استغرب يامن جداً من الموقف وسكت .. وفي الميعاد اللي اتفقوا عليه رجع عمو حسام لبابا يامن الفلوس اللي أخذها منه تاني .. بعدها بيومين مامته قالت لباباه أنها عرفت من الجيران أن عمو حسام جارهم تعبان جداً .. نزل بابا يامن اشترى هدية وطلب من يامن أنه يجي معاه يزوروا عمو حسام جارهم علشان مريض ويظمنوا عليه في البيت .. استغرب يامن جداً من تصرف باباه .. وراح مع باباه من سكات .. وبعدها بكام يوم عرف بابا يامن أن والدة عمو حسام جارهم أتوفت .. حزن جداً بابا يامن .. وطلب من ماما يامن أنها تيجي معاه علشان يروحوا عند عمو حسام ويعزوه ويخففوا عنه بعد موت والدته .. وكالعادة استغرب يامن وسكت.

وبعد ما بفترة جه عيد الأضحى .. وبعد ما ذبح الجزار الخروف أخذ كيس لحمه وأداها ليامن وقالوا روح خبط على عمو حسام .. وقول له كل سنة و حضرتك طيب يا عمو وأدبلوا الكيس دة .. استغرب يامن جداً بس المرة دي ما سكتش وسأل باباه .. هو عمو حسام دة قريبننا؟ ليه حضرتك بتتعامل معاه كدة .. رد باباه وقاله لا هو مش قريبننا بس جارنا وديننا بيوصينا أننا نعامل جيرانا معاملة كويسة .. وفي آداب حددها الدين اسمها أدب الجوار .. بتوصينا أننا نساعد جارنا إذا احتاج مساعدة .. ونزوره لو كان مريض ونعزيه لو عنده حالة وفاة .. ونهنيه في الأعياد والمناسبات السعيدة .. وكمان سيدنا محمد عليه الصلاة والسلام وصانا إتنا نكرم جارنا وما نأديهوش أبداً .. وكان دايمًا بيوصي الصحابة على جيرانهم وكمان قال (من كان يؤمن بالله واليوم الآخر فليحسن إلي جاره) .. ساعتها بس فهم يامن ليه باباه كان بيتصرف كده مع عمو حسام.

حدوتة (٤) فستان الأرنوبة ريري

الهدف منها تعليم الأطفال الرضا والقناعة وتقدير تعب الأم والأب

كان يا ما كان .. كان في زمان .. أرنوبة صغيرة اسمها ريري .. كانت ريري أرنوبة شقية بتتعب مامتها جدًا .. كل يوم الصبح مامتها تسألها تحبي تفطري أيه يا ريري؟ .. أجيب لك جزر تقول لها لا .. طيب أجيب لك خس؟ .. ترد ريري وتقول لا .. أجيب لك مربى جزر؟ .. تهز راسها وتقول بردو لا .. طيب أجيب لك عصير جزر؟ ترد وتقول بردو لا .. كل الأكل اللي بتعمله يا ماما مش عاجبني.

مامتها زعلت منها جدًا وقالت لها على العموم يا ريري هو ده الأكل الموجود عندنا .. ولو مش عاجبك متاكليش منه وخليكي جعانة كدة .. قعدت ريري في أوضتها تلعب لوحدها وأخر النهار باباها رجع من الشغل وعامل لها مفاجأة .. كان جايب لها فستان هدية وبقي له فترة ببجوش فلوس علشان يجيبه لريري تحضر بيه حفلة المدرسة.

دخل لريري أوضتها وقالها غمضي عينك يا ريري .. فرحت ريري وغمضت عينها .. ولما فتحت عينها وشافت الفستان كشرت وزعلت وقالت لباباها .. أية الفستان ده .. ده وحش أوي يا بابا .. باباها أتصدم من رد فعلها وزعل جدًا .. وقال لها معقول ده أنا بقى لي كثير بشتغل وبتعب علشان أحوش فلوس واشتري لك الفستان الجميل ده وفي الآخر ما يعجبهاش وبدل ما تقولي شكرًا يا بابا تردي عليا وتقول لي كدة .

أخذ باباها الفستان وراح لمامتها وحكى لها اللي حصل .. مامتها اتضايقت جدًا وخصوصاً لما شافت الفستان ولاقيته جميل جدًا .. واستغربت إزاي ما عجيش ريري وإزاي ردت على باباها بالطريقة دي .. باباها قال لمامتها خلاص أنا مش ها جيب لها أي حاجة تاني .. وهدى الفستان ده للأرنوبة سمسمة جارتنا تحضر بيه حفلة المدرسة .. وبالفعل أخذ الفستان وأداه للأرنوبة سمسمة .. وفرحت بيه جدًا وقالت له الله يا عمو ده جميل أوووي متشكرة جدًا جدًا.

وبعد شوية خرجت الأرنوبة ريري من أوضتها وسألت مامتها هو فين فستاني الجديد اللي باباه جابهولي .. عايزة ألبسه وأشوف شكله عليا كدة .. مامتها قالت لها خلاص يا ريري يا حبيبتى ما بقاش فستانك بابا أداه هدية للأرنوبة سمسمة جارتنا تحضر بيه الحفلة .. غضبت ريري جدًا وأتضايقت وقعدت تقول ليه كدة يا بابا .. عملت كدة لية يا بابا .. باباها قال لها أنتي ما عجبيش الفستان وقولتي عليه وحش أوي رغم أن عجب ماما والأرنوبة سمسمة جدا.

فضلت ريري تعيط وقالت طيب ها أحضر الحفلة بأيه دلوقتي؟ .. مامتها قالت لها البسي أي فستان قديم من اللي عندك وخلاص .. مش لازم فستان جديد .. ردت ريري لا بابا ها يجيبلي واحد تاني .. باباها قالها للأسف يا ريري الفلوس اللي معايا خلصت .. أنا بقى فترة طويلة بشتغل وبتعب وأحوش علشان أجيب لك الفستان ده .. ساعتها بس فهمت ريري هي قد أيه ضايقت باباها لما قالت له أن الفستان وحش أوي .. أو لما كانت بتقول لمامتها أن أكلها وحش ومش بتحبه وماترضاش تاكل منه.

اعتذرت ريري لباباها .. ووعدته أنها مش هتعمل كدة تاني .. وأنها بعد كدة ها تشكره هو ومامتها على أي حاجة يجيبوها لها أو يعملوها لها .. لأنهم بيتعبوا جدًا علشانها .. باباها سامحها ووعدا أنه ها يجيب لها فستان جديد غيره.

حدوتة (٥) هدبة ريتاج

الهدف منها توعية الأطفال للبعد عن الأنانية والطمع

كان يا ما كان .. كان في زمان .. بنت اسمها ريتاج .. كان عندها أخت اسمها سما .. وفي يوم من الأيام .. بعد ما خلصوا امتحاناتهم .. ونجحوا بتفوق .. باباهم فكر يكافئهم بهدية حلوة لكل واحدة فيهم .. رجع باباهم البيت

ومعاه الهدايا .. أول ما دخل لاقى ريتاج قاعدة بتتفرج على التليفزيون .. ندهلها وأداها الهدية وقال لها ألف مبروك النجاح يا حبيبي الهدية دي ليكي .. ودي أديها لأختك سما في أوضتها.

مسكت ريتاج الهديتين وبصلتهم .. لاقيت أن هدية سما حجمها أكبر من بتاعتها .. أول ما بابا دخل أوضته .. فكرت ريتاج في فكرة وحشة أوي .. أنها تبديل الهدايا .. وتأخذ الهدية بتاعة سما لنفسها وتدي هديتها لسما .. وراحت بالفعل أوضة سما وأديتها هديتها .. وخذت الهدية الكبيرة وفتحتها لاقيت جواها دبدوب أحمر كبير .. ولما سما فتحت هديتها .. لاقيت جواها عروسة جميلة أوي بتغني وترقص.

أتصدمت ريتاج من المفاجأة .. كان نفسها في العروسة دي وطلبتها من باباها قبل كدة من فترة .. وهو وعدا انه ها يجيبها لها .. قعدت تفكر .. أزاى هتأخذ العروسة من سما؟ وهي بقت بتاعتها خلاص .. فضلت تعيط وتقول لنفسها أعمل أيه دلوقتي؟ .. أنا إللي غلطانة .. العروسة دي هديتي أصلاً وكان نفسي فيها واختارتها .. وبابا كان جايبها لي أصلاً .. أنا اللي طمعت في هدية سما .. وافكرت فيها هدية أكبر .. وكنت عايزة أخذها لنفسى.

دخل باباهم عليهم الأوضة .. جريت عليه سما وحضنته وباسته وقالت له شكراً يا بابا على العروسة الجميلة دي .. بس أنا كان نفسي في الدبدوب الأحمر .. أنت عارف يا بابا إني بحبه .. استغرب باباها لأنه عارف أن العروسة دي هو جايبها لريتاج أصلاً.

بص لريتاج لاقها حزينة .. ساعتها فهم اللي حصل .. اخذ ريتاج برة الأوضة وأتكلم معاها .. قالها مش أنا أديتك هديتك في أيدك العروسة دي بتاعتك أنتي .. قالت له أنا أسفة يا بابا .. أنا لما لاقيت العلبة بتاعت هدية سما أكبر .. طمعت فيها وأخذتها لنفسى .. باباها قال لها ودي نهاية الطمع .. تعالي نفكر سوا في حل للموقف ده بسرعة .. سما نفسها في الدبدوب الأحمر الكبير .. ممكن نروح أنا وأنتي لسما .. ونقول لها على اللي حصل وتتعذري لها وأن أنا جايب لك أنتي العروسة ولها هي الدبدوب الأحمر الكبير .. وكدة كدة أنتوا أخوات وبتلعبوا مع بعض باللعبتين .. فرحت ريتاج بفكرة باباها جداً .. ونفذوها .. فرحت ريتاج بالعروسة .. ووعدته أنها مش ها تعمل كدة تاني أبداً.

حدوتة (٦) البقرة سمسة

الهدف منها البعد عن الغرور وعدم التقليل من دور أي فرد

كان يا ما كان .. كان في زمان .. بقرة أسمها سمسة .. كانت البقرة سمسة عايشة في مزرعة مع مجموعة من الحيوانات والطيور .. كل الطيور والحيوانات كانت بتحب البقرة سمسة ونفسهم بيبقوا أصحابها .. لكنها كانت مغرورة ومش بتكلم حد فيهم وبتحب تقعد لوحدها .. من ساعة ما صاحب المزرعة جابها وخصص لها مكان تنام فيه .. وهي مش بتكلم باقي الحيوانات .. في الأول الحيوانات افتكروها خيفة عشان غريبة عنهم ولسه جديدة في المزرعة .. وحاولوا كثير يتقربوا منها وتبقي صاحبتهم .. وطلبوا منها تلعب معاها لكنها كانت بترفض .. وتبصلهم وتسيبهم وتمشي.

وفي مرة قرب منها الأرنب فوفو وسألها أنتي أيه حكايتك بقي .. أنتي زعلانة مننا ولا اية؟ .. أنتي مش بتكلمينا ليه؟ .. قالت له وأنا اتكلم معاكم ليه؟ أنتم مش بقر .. وأنا بقرة لكن .. وأنا أكثر واحدة مفيدة في المزرعة .. وبشتغل أكثر منكم .. أنا بساعد صاحب المزرعة في الزراعة وبيأخذ مني اللبن بيشر منه وبيبيع الباقي وجزء بيعمل منه الزبدة والجبنه وبيكسب فلوس كثير.. لكن أنت بقي يا أرنب فوفو بتعمل أيه؟ .. أية فايدتك في المزرعة؟.

قال لها أنا بعرف أعمل حاجات كثير .. قالت له بس بردو مش زيي أنا . وسابيته ومشيت .. وهي ماشية بسرعة أتكعبلت في حبل مرمي على الأرض .. ومن غرورها مرضيتش تبص تحتها ورفعت راسها لفوق وكملت مشي الحبل أتعد في رجلها ووقعت على الأرض.

الوقعة كانت جامدة أوووي ودماغها أتخبطت في الأرض .. الأرنب فوفو جري بسرعة عليها علشان يطمئن عليها ويعرف جرى لها أيه .. لقي الحبل معقود في رجليها ولازم يتقطع.

الأرنب قرب من وش البقرة سمسة وقال لها ما تخافيش .. بسيطة إن شاء الله .. الحبل بس أتعد في رجلك وأتربط جامد ولازم يتقطع .. ما تقلقش أنا أقدر أساعدك .. أنا ها روح أنه صاحب المزرعة يجيب مقص ويقص الحبل .. قالت له بس صاحب المزرعة مش موجود .. ده خرج وها يرجع بكرة الصبح .. يعني ها أفضل كدة لحد بكرة الصبح .. قال لها طيب خلاص أنا جت لي .. فكرة أنا أسناني قوية وحامية زي السكينة ممكن أقرقض الحبل بأسناني وأقطعه وأفكك من الحبل.

وبالفعل بدأ الأرنب فوفو يقطع الحبل بأسنانه لحد ما فك البقرة سمسة .. وأتجمعت باقي الحيوانات وفضلوا يسندوها ويساعدوها لحد ما وقفت على رجليها .. فرحت جداً سمسة وشكرتهم وكانت مكسوفة جداً من نفسها .. علشان غرورها خلاها تبعد عن باقي الحيوانات وتفكر نفسها أحسن منهم .. ماكنتش تعرف أن كل حيوان في المزرعة له دور ووظيفة .. مش لازم كلنا نكون زي بعض .. وأن لولا مساعدة الأرنب فوفو وباقي الحيوانات اللي في المزرعة ما كنتش عرفت تفك الحبل من رجليها .. ومن ساعتها بقت البقرة سمسة بتحب كل الحيوانات و هما كمان بيحبوها ويقوا أصحاب جداً.

حدوتة (٧) أظافر علي

الهدف منها توعية الأطفال بخطورة عادة قضم الأظافر

كان يا ما كان .. كان في زمان .. ولد اسمه علي .. كان علي ولد جميل ومؤدب .. لكن كان بيعمل عادة وحشة جداً جداً .. كان بيحط أيده في بوؤه ويقرض ضوافره بأسنانه .. كانت مامته الأول بتقصف له ضوافره بالقصافة .. ومرة واحدة بدأت مامته تلاحظ أن ضوافره قصيرة جداً وأنه على طول أيده في بوؤه.

مامته أتكلمت معاه وفهمته أن كدة غلط يا علي .. لأن من أساس النظافة الشخصية تسريح الشعر وتقصيف الضوافر وغسيل الأسنان .. وغسل الأيدي .. غير أن الضوافر بيبقى تحتها ميكروبات وبكتريا ها تدخل بوؤك تنزل في معدتك وتتعبك .. وتجيب لك نزلات معوية شديدة وبطنك هاتوجعك .. بعد الشر عنك طبعاً يا حبيبي .. دة غير أن ضوافرك لما تقرقضها بأسنانك ها تتضرر وممكن تتعور وتوجعك.

رد علي وقال لها .. أنا غصب عني يا ماما وأنا مركز مع الميس في الفصل أو وأنا بتفرج على التلفزيون بلاقي نفسي بحط أيدي في بوؤي وأقعد أقرقض في ضوافري .. قالت له بس يا حبيبي دي عادة غلط جداً ولازم تبطلها .. وبعد فترة مامته قالت له .. عارف يا علي .. البننت عاليا جارتنا جرى لها إية الأسبوع اللي فات؟ قال لها علي إيه يا ماما جرى لها إية؟ قالت كنت بتحب تقرقض ضوافرها وعلى طول أيدها في بوؤها ولما مامتها تيجي تقصف لها بالقصافة ما كنتش بتلاقي حاجه تقصها .. واستمرت كدة لفترة لحد ما صوابها إتعورت وبقت بتنزل دم كثير.

وراحوا للدكتور وربط لها صوابها وكتب لها على علاج .. وما بقتش تعرف تمسك حاجة بأيديها أو تعرف تاكل .. وكانت بتتألم منها .. علي زعل جداً علي عاليا .. وطلب من مامته أنهم يطلعوا يزوروا ويمسكوا عليها .. مامته وافقت .. ولما طلع علي وشاف منظر أيد عاليا أتخض .. أصله ما كنش متوقع أنه ها يشوفها وهي بتتألم من وجع الجروح اللي في صوابها .. وصعبت عليه جداً .. أول ما نزلوا من عندها جري بسرعة لمامته وقال لها: ماما أنا خلاص ها بطل أقرقض ضوافري .. أنا لازم أبطل بجد .. بس إزاي؟ أنا مش عارف .. قالت له بص يا علي أنت لازم تشغل أيديك في أي حاجة تعملها.

يعني ممكن تمسك كراسة رسم وترسم وتلون .. ولو بتفرج علي التلفزيون ونسيت وحطيتها في بوؤك .. أول ما تفكر طلعتها بسرعة وربع أيديك أو حطها جنبك .. وحاول تبعدها عن وشك .. مرة في مرة كل ما تنسى ها

تفكر وتشيلها لحد ما تبطل العادة الوحشة دي .. وأنا كمان ها ساعدك وها أفكرك وإن شاء الله ها تبطلها مدام أنت قررت تبطلها من نفسك.

حدوتة (٨) مصروف عمر

الهدف منها تعليم الطفل القناعة والرضا بالرزق

كان يا ما كان .. كان في زمان ولد اسمه عمر .. كان عمر ولد جميل وشاطر في المدرسة .. مامته كانت بتندي له مصروف يومي ٢ جنيه عشان يشتري بيه حاجة حلوة لنفسه ياكلها في المدرسة .. وفي يوم وعمر بيتكلم مع صاحبه وليد سأله .. عمر أنت بتاخذ كام مصروف كل يوم؟ عمر رد وقال له باخد ٢ جنيه.

استغرب وليد أوي وسأل عمر ودول بيكفوك أزاى؟ بتعرف تجيب بيهم حاجات حلوة لنفسك وقعد يضحك .. اتكسف عمر وبص له وسكت .. وليد قال له أنا ماما بتندي لي مصروف ٥ جنيه كل يوم .. عمر بقي مش عارف يرد يقول إيه وكان مكسوف جداً.

أول ما روح عمر البيت جري على مامته وقال لها لو سمحتي يا ماما أنا عايز أكلمك في موضوع .. قالت له قول يا حبيبي .. قال لها ممكن تطلبي من بابا يزود المصروف بتاعي .. قالت له ليه يا عمر أنت بتاخذ مصروف ٢ جنيه وكمان بتاخذ معاك سندوتشات من البيت يعني بتجيب لنفسك بالمصروف حاجة تاكلها جنب السندوتشات.

زعل عمر وقال لها لا أنا مصروفي قليل جداً .. أشمعا وليد صاحبي مامته بتندي له مصروف ٥ جنيه في اليوم .. مامته استغربت أوي من كلامه واتضايقت منه .. لأنه بيقارن نفسه بجد من أصحابه .. وأنه مش ببيحمد ربنا على اللي معاه ويرضي بيه وباصص للي في أيدي غيره.

مامته قالت له .. بص يا عمر المصروف اللي أنت بتاخده ده من فلوس باباك .. هو اللي بيتعب ويشغل عشان يجيب لك الفلوس دي .. وأحنا المفروض نرضي ونحمد ربنا على اللي معانا .. ونبص للناس اللي أقل منا ونقول الحمد لله .. أحنا عندنا بيت عايشين فيه غيرنا مش عنده بيت وعايشين في الشارع .. أحنا معانا فلوس نجيب بيها أكل ناكله وفي ناس تانية مش معاهم فلوس تجيب بيها أكل لنفسها.

يبقي نحمد ربنا إننا أحسن من غيرنا بكثير .. نحمد ربنا على اللي معانا .. مش نقول صاحبي بياخذ مصروف أكثر مني .. أحنا مالناش دعوة بحد .. سمع بابا عمر كلام عمر مع مامته .. وهو واقف عند باب أوضة عمر.. ومرضاش يدخل غير لما عمر يخلص كلامه مع مامته.

وقالوا بص يا عمر أنا نفسي أجيب لك كل الحاجات الحلوة اللي في الدنيا كلها .. وممكن أدي لك مصروف أكثر من صاحبك .. بس في حاجات تانية ها نحتاجها .. ومش ها يبقى معانا فلوس نجيبها .. يعني مش هانقدر نروح المصيف اللي بتستاه كل سنة في أجازة الصيف .. لأن هو ده رزقنا اللي بيديهلنا ربنا يبقى لازم نحمد ربنا ونشكره .. عمر عرف أن باباه ومامته عندهم حق واقتنع بكلامهم وقال الحمد لله.

حدوتة (٩) أسنان الدبة بصلة

الهدف منها حث الأطفال للمحافظة على أسنانهم

كان يا ما كان .. كان في زمان .. دبة صغيرة وجميلة اسمها بصلة .. وفي يوم من الأيام صحيت بصلة على ألم شديد في أسنانها وقعدت تصرخ وتنده على مامتها .. يا ماما يا ماما .. سناني بتوجعني أوي .. مامتها قالت لها أهدي شوية بس يا بصلة .. وأفتحي بوؤك كدة أشوف اللي بيوجعك .. مامتها شافت سنة من أسنانها لونها غامق عن باقي الأسنان .. قالت لها الظاهر يا بصلة أن في سنة عندك مسوسة وهي اللي عاملة لك الوجع ده.

أحنا لازم نروح للدكتور توم بتاع الأسنان .. راحت بصلة للدكتور توم .. وأول ما كشف عليها وشاف أسنانها قال لها .. الظاهر يا بصلة إنك بقالك فترة مش بتهتمي بنظافة أسنانك ومش بتغسلها بالفرشاة والمعجون وبتاكلها حلويات وحاجات مسكرة كتير .. هزت بصلة رأسها وقالت للدكتور فعلاً أنا بقي لي فترة بكسل أغسل أسناني بعد الأكل .. ومبقتش مهتمة بيها خالص .. وباكل عسل كتير أنت عارف يا دكتور أن الدببة بتحب العسل.

قال لها عارف يا بصلة بس كان لازم تغسلي أسنانك كويس بعد الأكل .. وخصوصاً قبل النوم .. لأنك لما ما بتغسلهاش بعد الأكل .. بواقى الأكل بتلرزق في أسنانك .. وده بيخلي السوس يبدأ يأكل في الأسنان ويكسرها فأسنانك طبعاً توجعك الوجع اللي أنتي حسيتيه دلوقتي .

بدأ الدكتور توم ينظف للدبة بصلة سننها اللي بتوجعها ويعالجها .. ولما خالص أكد عليها أنها لازم تغسل أسنانها كويس بعد الأكل على طول بالفرشاة والمعجون .. وإلا كل فترة ها يحصلها اللي حصل ده تاني وسنة تانية من أسنانها ها تسوس بردو .. وهاتيحي تاني المستشفى علشان يعالجها.

ردت الدبة بصلة بخوف .. لا يا دكتور توم .. أنا خلاص ها أهتم بتنظيف أسناني بعد كدة على طول .. خرجت بصلة من عند الدكتور توم وهي بتغني وبتقول .. عندي فرشاة أروبة ليها شعر صغنون .. ومعها أنبوبة بتطلع معجون .. أخذ من دي على دي وأنظف أسناني .. الصف فوقاني من فوقه لتحتيه .. والصف التحتاني من تحتيه لفوقيه.

فرحت مامتها بيها جدا وقالت لها برافو عليك يا بصلة أنتي دبة شاطرة .. ضحكت بصلة وقالت لها يا ماما الوجع بتاع سنني كان فظيبييع .. أنا لازم أحافظ على أسناني طبعاً علشان متسوسش تاني أبداً .. وها أغسلها على طول بالفرشاة والمعجون وأحافظ عليها من التسويس.

حدوتة (١٠) شموسة والسحابة

الهدف منها توعية الأطفال بأهمية الشمس والسحاب

كان يا ما كان .. كان في زمان .. سحابة كبيرة ماشية في السماء .. كانت السحابة فرحانة جداً أن حجمها كبير .. فضلت تمشي تمشي لحد ما جت قدام الشمس ووقفت .. الشمس أتضايقت منها جداً .. وقالت لها بغضب .. من فضلك ممكن تبعدني عني شوية .. ردت السحابة وقالت لها مالك يا شموسة؟ زعلانه ليه؟ قالت لها أنا متضايقة منك أنتي .. أتفضلني أبعدني عني شوية .. أنتي جيتي وقفتي قدامي ومنعتي الضوء الجميل بتاعي يوصل للناس ينور لهم الكون .. وكمان منعتي الحرارة توصل لهم وتدفئهم.

زعلت منها السحابة وقالت لها .. أنا حسيت إن الحرارة بتاعة النهاردة شديدة أوي .. فقولت أقف قدامك شوية عشان أبرد الجو شوية والناس ما تضايقيش .. ردت شموسة وقالت لها يا سلام .. لا هما بيحبوني ويحبوا النور والحرارة بتاعتي .. أتفضلني بقي أبعدني عني شوية .. لأن الناس زمانهم حاسين بالبرد ومستنينك تمشي علشان أظهر لهم تاني وأدفي لهم الجو.

ردت السحابة وهي متغاظة من كلام شموسة .. وقالت لها طيب ده ساعات بتبقي الحرارة بتاعتك شديدة .. والناس بتفضل تدور على أي شجرة ولا أي مكان يستخبوا فيك منك .. و من نورك وحرارتك.

يعني لو أنتي فاكرة أن الناس بتحبك أنتي وما بتحبنيش .. تبقي غلطانة .. بصت لها شموسة وقالت لها طبعاً بيحبوني أنا .. أنا بفيديهم .. أول ما بظهر الصبح ينور لهم الدنيا .. والحرارة بتاعتي بتدفي لهم الجو .. عشان كدة حتي ناس كتير بتحب الصيف .. وفي الشتا لما بغيب عنهم والسحاب الكثير بيغطيني .. بيفضلوا يقولوا أمتي الشمس تطلع بقي وتدفي الدنيا.

أتضايقت منها السحابة الكبيرة .. وقالت لها أنتي مالك مغرورة كدة ليه؟ .. خلاص تعالي نعمل اختبار ونشوف الناس بتحب مين فينا أكثر .. الشمس ردت عليها موافقة لأنني متأكدة أن أنا اللي ها أكسب .. قالت لها ماشي .. اتفقنا يا شموسة أما نشوف .. أنا ها أختفي لمدة أسبوع وها أسبيك تطلعي لوحدك كل يوم .. وبعدين أنتي تختفي أسبوع وأظهر أنا بس .. ونشوف الناس ها تعمل أيه؟.

فعلا قعدت الشمس تطلع لوحدها كل يوم .. تنتشر نورها وحرارتها في كل مكان في الكون .. ويوم بعد يوم .. بدأ الناس تشعر بالحر ويتعبوا فعلاً .. وبدأت الشمس تلاحظ أن الناس ماسكين على راسهم شمسيات عشان تمنع عنهم أشعتها ونورها وحرارتها .. ويستخبوا تحت الشجر وجوه بيوتهم .. ولما خلص الأسبوع بتاع الشمس .. فرحت جداً السحابة أن الناس زهقت من الشمس المغرورة .. وقالت لها شوفي بقي الناس ها تتبسط إزاي في الأسبوع بتاعي.

واختفت الشمس وظهرت السحابة الكبيرة .. في الأول الناس فرحت أنها ها ترحمهم من الشمس وحرارتها .. ويوم بعد يوم بدأوا يحسوا بالبرد ويتعبوا .. ويلبسوا لبس ثقيل عشان يتدفوا .. ولما السحابة مطرت كمان مطر شديد .. الناس بقت بتجري في الشوارع عشان يستخبوا من المطر والبرد.

لما انتهى الأسبوع بتاع السحابة .. وقفت شموسة والسحابة وها مكسوفين جداً من أنفسهم .. كل واحدة فيهم اكتشفت أنها مش أفيد من الثانية .. وأن الناس مش يبحبوا حد فيهم أكثر من الثاني .. اعتذرت شموسة للسحابة .. واعتذرت السحابة لشموسة .. وقالت لها الناس بتحبنا أحنا الاتنين .. لأننا بنكمل بعض .. وكل واحد فينا له دور في الكون بيعمله .. يعني الناس ما تقدرش تستغنى عن حد فينا.

حدوتة (١١) حمزة وكوباية اللبن

الهدف منها توعية الأطفال بأهمية شرب اللبن وفوائده

كان يا ما كان .. كان في زمان .. ولد اسمه حمزة .. حمزة كان ولد شاطر ومؤدب .. لكن مشكلته أنه مش بيحب يشرب اللبن وبيحب يشرب البيبسي بس .. وكان دايمًا بيتهرب من مامته لما تقوله يلا يا حمزة أشرب اللبن .. بالليل بيعمل نفسه نام ونسيه .. والصبح يقول مش بحبه طعمه وحش.

باباه كان دايمًا بيقوله .. يا حمزة أنت لسه صغير وجسمك بيتبني .. ومحتاج اللبن عشان جسمك يبقى قوي لما تكبر وعضك وأسنانك كمان تبقى قوية وما تتكسرش .. لازم تشرب اللبن لأنه مليان فيتامينات وكالسيوم والحاجات دي جسمك محتاجها وهي اللي بتقوي جسم الإنسان .. مش البيبسي .. لكن بردو حمزة ما كنش بيشر اللبن بحجة أن طعمه وحش.

وفي يوم من الأيام مامته جابت له كوباية لبن عشان يشربها قبل النوم كالعادة .. حظ حمزة الكوباية جنبه وبعد ما مامته نامت .. أخذ كوباية اللبن وحطها في التلاجة .. وراح نام على سريره .. وهو نايم حس أنه عطشان أوي فقرر أنه يقوم يشرب مايه من التلاجة .. وأول ما قرب من التلاجة سمع صوت كأن حد بيعيط .. فضل حمزة يقرب من التلاجة وصوت العياط يقرب ويزيد .. ولما فتح التلاجة اكتشف أن كوباية اللبن اللي مشربهاش هي اللي بتعيط.

أول ما شافها حمزة بسرعة مسكها وأخذها وقفل التلاجة .. وسألها مالك أنتي بتعطي ليه؟ .. ردت كوباية اللبن وقالت يعني مش عارف أنا بيعيط ليه؟ .. رد حمزة وهو مكسوف منها هو أنتي بتعطي عشان أنا ما شربتكيش وحطيتك في التلاجة .. قالت له يعني هو أنت ما شربتنيش النهاردة بس؟ .. أنت أصلاً مش بتحبني وما بتشربنيش خالص .. وعلى طول بتحب تشرب من المشروبات الساخنة دي زي البيبسي والبرتقال والسفن .. مع أني والله مفيدة جداً وعندي فيتامينات كتير بتغذي الجسم وبتكبره وبتخليه أقوى .. وكمان عندي كالسيوم بيقوي العضم والأسنان .. لكن السبب بقي اللي خلاني أعيط هو أن إزارة البيبسي بتاعتك اللي في التلاجة عمالة

تغيظني وتقولني حمزة يبحبني أكثر منك .. وكل شوية يجي يفتح التلاجة ويشرب مني .. أنا نفسي أعرف بس يا حمزة أنت ليه مش بتحبني؟

رد حمزة وقال لها .. أقولك السبب بس ما تزعليش مني .. أصل أنتي طعمك وحش لكن البيبسي طعمه جميل ومسكر .. ويا سلام لما يتبقى ساعة يتبقى لذيدة أوي .. أتضايقت كوابية اللين جدا من حمزة وقالت له بس علي فكرة البيبسي اللي بتقول طعمه حلو أوي دة ضار جدا للأطفال الصغيرين .. بيضعف عضمهم ويخلي جسمهم كله ضعيف وكمان بيخلي أسنانك ضعيفة وتتكرس بسهولة .. وبيبقي سهل أوي تدخل فيه الأمراض كمان .. أتخض حمزة لما سمع كلام كوابية اللين وقال لها .. أنتي بتتكلمي بجد؟ .. ردت وقالت له والله بجد ولو مش مصدقني أسأل باباك ومامتك وتأكد منهم.

كملت كوابية اللين كلامها وقالت له طيب أنت جربت تحط عليا كاكاو وسكر وتدوقني؟ قال لها لا .. قالت له طيب جربت طعمي مع عصير الفاكهة في الخلاط .. رد حمزة وقال لها بردو لا .. قالت له دة أنا بيبقي طعمي لذيد أوي مع الموز والجوافة وكمان الفراولة .. جرب وصدقني طعمي هيعجبك .. ابتسم حمزة وقال لها أوعدك إني ها أجرب .. فرحت كوابية اللين وقالت له يلا بقي رجعني التلاجة وأشرب مائة وأرجع لسريرك.

ضحك حمزة وقال لها لا أنا مش ها أشرب مائة .. أنا ها أشربك أنتي .. وفجأة صحي حمزة من النوم علي صوت مامته وهي بتقوله يلا يا حمزة ها تتأخر علي المدرسة .. قام حمزة من النوم واكتشف أنه كان يبلم .. بس كان حلم جميل .. وراح لمامته وطلب منها تعمل له كوابية لبن بالكاكاو يشربها قبل ما يروح مدرسته.

حدوتة (١٢) أمير في قصر السلطان

الهدف منها حث الأطفال للاعتماد على الذات

كان يا ما كان .. كان في زمان .. ولد اسمه أمير .. وكان أمير ولد فقير عايش مع باباه ومامته في بيت صغير بالقرب من قصر السلطان .. باباه كان بيشتغل صياد وكان بيخرج كل يوم يصطاد سمك بالمركب الصغير ويرجع يبيعه في السوق .. وبتمنه كان بيحب أكل لمراته وابنه أمير.

وفي يوم من الأيام تعب باباه تعب جامد .. وما بقاش بيقدر يخرج من البيت أو يشتغل .. مامته أمير ما بقتش عارفة تعمل أيه؟ ما بقاش معاها فلوس تجيب العلاج لبابا أمير أو حتى أكل ليهم .. فضل أمير يفكر مع مامته يتصرفوا أزاوي؟ .. وفي الآخر قرر أمير أنه ياخذ الشبكة بتاعة باباه ويخرج الصبح يصطاد بيها .. وركب المركب الصغير .. ومشى بيها حبه في البحر.

وفجأة هبت رياح جامدة والموج بقي عالي والمركب بتاعة أمير بدأت تتمايل جامد يمين وشمال .. وأمير بقي خايف ومرعوب مش عارف يعمل أيه .. شافه السلطان اللي كان خارج يتفصح في البحر بالمركب بتاعه بالصدفة وأمر الحراس أنهم ينفخوا الولد الصغير بسرعة.

أخذ السلطان أمير معاه في القصر وعرف منه حكايته .. السلطان زعل أوي وصعب عليه أمير لأنه طفل صغير وعايز يشتغل علشان يساعد باباه المريض .. مد السلطان أيده لأمير وقال له خذ الفلوس دي مساعدة مني ليك وكل فترة ها أبعثك الحارس لحد البيت بفلوس تانية .. غضب أمير جداً من كلام السلطان وقال له لا أنا مش محتاج فلوس أنا عايز أشتغل .. رد السلطان وقال له ها تشتغل أيه بس وأنت لسة صغير؟ رد أمير وقال أنا ممكن أتعلم أي شغل .. قال السلطان خلاص أنا ها أعلمك الزراعة وها أخليك تشتغل في حديقة القصر بتاعي.

الفكرة عجبت أمير جداً وقال للسلطان خلاص اتفقنا .. ومن بكرة ها أبدأ شغل .. كان السلطان متأكد أن أمير طفل صغير مش ها يعرف يشتغل أو يعمل حاجة .. وكان فاكراً أنه ها يساعد أمير ويدي له فلوس وخلاص بطريقة ما تحسسهوش أنه فقير ومحتاج مساعدة .. ومرت الأيام وفي يوم والسلطان بيص من الشباك بتاع

أوضته على حديقة القصر .. أتفاجئ بالمنظر اللي شافه .. حديقة القصر بقت جميلة أوي ومنظمة ومليانة شجر فاكهة وخضروات والزهور .. نده السلطان للحارس وسأله مين اللي عمل كدة في حديقة القصر؟.

رد الحارس وقال الطفل أمير اللي حضرتك أمرتنا أنه يتعلم الزراعة ويشتغل في حديقة القصر .. أندهش السلطان وما كنش مصدق .. معقول؟ أنا كنت فاكهه أنه طفل ومش ها يعرف يشتغل أو يعمل حاجة .. طلب السلطان من الحارس أنه ينده لأمر بسرعة .. وسأله أنت عملت كدة إزاي وأنت صغير في السن؟ .. ابتسم أمير وقال أنا ممكن أكون صغير في السن بس عندي عقل فكرت بيه إزاي أخلي الحديقة جميلة ومنظمة؟ أنا طول عمري بحلم أكون غني وعندي بيت قدامه حديقة كبيرة .. وأنا بشتغل كنت بتخيل أن الحديقة دي بتاعتي وفضلت أفكر إزاي أخلي حديقتي أجمل حديقة في الدنيا؟ وإزاي أخلي أي حد يشوفها وينبهر بيها وزرعت فيها كل أنواع الزهور اللي بحبها .. و كمان زرعت شجر الفاكهة والخضروات واهتمت بيها لحد ما بقت بالشكل ده.

اتبسط السلطان أوي من كلام أمير وقال له ياااااه لو كل واحد عمل زيك يا أمير وفكر وهو بيشتغل في أي مكان إن المكان ده ملكه .. كان زمان كل الدنيا حوالينا جميلة ومنظمة زي حديقة القصر كدة بالطبط .. وبعدها قرر السلطان يكافئه على شغله وتعبه .. وأدى له بيت قدامه حديقة كبيرة زي ما أمير كان بيتمنى.

حدوتة (١٣) الكلب روكي

الهدف منها حث الأطفال على الرفق بالحيوان

كان يا ما كان .. كان في زمان .. كلب طيب أوي اسمه روكي .. كان روكي محبوب من كل أصحابه الكلاب لأنه حنين جدا وبيساعد أي حد منهم لو احتاج مساعدة .. كان روكي بيشتغل حارس مزرعة بيحمي الطيور والخرفان اللي فيها من أي ذنب ممكن يأديهم.

وفي يوم وهو بيتمشى حول سور المزرعة .. شافوه شوية أولاد أشقية .. فضلوا يضيقوا روكي ويقربوا منه .. وهو لأنه طيب مش عايز يأذي حد فيهم .. اتطمن الأولاد أكثر وقربوا منه وبدأوا يحطوا أيدهم على جسمه .. ولما حسوا أنه طيب ومش ها يعملهم حاجة .. طلعا حبل وربطوه في رقبتة .. أتفاجئ روكي باللي عملوه وبدأ يهوه بصوت عالي عشان مش عايز يعرض أو يخربش حد فيهم.

فضل يحاول يبعدهم عنه لكن الأولاد الأشقية فضلوا يضحكوا ويتريقوا عليه .. أنهم قدروا يربطوه بالحبل وأفتكروا أنهم بكدة هما الأقوياء وأن روكي كلب ضعيف .. بدأوا الأولاد يجروه بالحبل وروكي يتشد من رقبتة .. كان بيتألم جدا ومش عارف يعمل أيه .. والأولاد يجروه جامد لحد ما الحبل جرح رقبتة وأتعود وبقي بينزف .. والأولاد يضحكوا ومش حاسين أنه بيتألم وبيتعذب .. وبعد ما الأشقية تعبوا وزهقوا من الجري واللعب بروكي سابوه مرمي على الأرض جسمه مليان جروح وبينزف دم.

بالصدفة ومجموعة كلاب من أصحابه شافوه بالحالة دي .. جريوا عليه ووقعدوا يحاولوا لحد ما فكوا الحبل من رقبة روكي وشالوه لحد المزرعة .. شافه صاحب المزرعة خده نظف الجروح وربطها وعالجه .. ولما سأل روكي أنت ليه سكت لهم؟ ليه ما دافعتش عن نفسك؟ ليه ما عضتهمش حتي؟ رد روكي وقال له لأنهم أطفال صغيرين ما حبتش أذي حد فيهم .. لأن الغلطة غلطة باباهم ومامتهم .. نسيوا وهما بيربوهم يعلموهم إزاي يعاملوا الحيوان برحمة .. ونسيوا يقول لهم أننا كائن حي زيهم بنحس وبتألم وبتتوجع.

وتاني يوم جيه الأولاد الأشقية عند سور المزرعة بيدوروا على روكي .. وشافهم صاحب المزرعة وكلمهم وفهمهم أن اللي عملوه ده حرام وذنب كبير .. ربنا ها يحاسبهم عليه .. حس الأولاد بالندم الشديد .. وطلبوا من صاحب المزرعة أنهم يقابلوا روكي .. ويعتذروا له ويطلبوا منه يسامحهم ويوعده أنهم مش ها يعملوا كدة تاني.

حدوتة (١٤) مالك الغضبان

الهدف منها توعية الأطفال بالبعد عن العصبية والغضب

كان يا ما كان .. كان في زمان .. ولد اسمه مالك له أخ صغير اسمه معاذ .. وفي يوم من الأيام طلب مالك من باباه أن يجيب له مكعبات لأنه نفسه فيها عشان يعمل بيها أشكال كثير .. باباه وافق ووعد أنه ها يجيبها له.

وفي يوم رجع باباهم من الشغل وكان جايب له علبة كبيرة أوي مليانة مكعبات كثيرة .. فرح بيها مالك جدا وفضل يلعب بيها ويكون بيها أشكال كثير .. وقعد مالك يرصص المكعبات ويركبها في بعضها لحد ما عمل شكل قصر كبير وجميل أوي .. وأخذ القصر عشان يوريه لباباه ومامته.

باباه ومامته عجبهم القصر جدا .. وكمان عجب أخوه معاذ .. طلب معاذ من مالك أنه يمسه وينفرج عليه حبة .. لكن مالك رفض وقال لا مش هينفع ده حجمه كبير وأنت صغير .. مش ها تعرف تمسكه وممكن يقع منك .. زعل معاذ وقال لأخوه ما تخافش أنا ها أخلي بالي منه ومش هابقع مني .. بص له باباه وقال له خليه يمسه ويلعب بيه شوية يا مالك ويرجعه لك .. رد مالك حاضر يا بابا.

مد مالك ايده لمعاذ بالقصر اللي عمله من المكعبات عشان يمسه .. وأول ما مالك سابه وقع القصر من أيدي معاذ على الأرض وأتكسر .. المكعبات فعلا كانت ثقيلة على معاذ .. وما قدرش يمسه كويس .. غضب مالك جدا من أخوه وقعد يزعق له بصوت عالي .. وقال لباباه شوفت يا بابا .. مش أنت اللي قولت لي أديه له يلعب بيه .. أهو كسره .. وأنا تعبت فيه جدا عقبال ما عملته بالشكل ده .. كل ده عشان بتحبوه أكثر مني .. وأي حاجة بيطلبها بتنفذوها له وخلص .. وإنهار مالك في العياط.

راح باباه وطببط عليه وقال له يا مالك .. أهدى بس .. مافيش أب أو أم يبحبوا حد من أولادهم أكثر من الثاني أحنأ بنحبكم أنتم الاثنين .. أما القصر بتاعك ده وقع منه غضب عنه .. أنا ما كنتش متخيل أنه ثقيل كده .. ومعاذ غلط فعلاً .. لأنه وعذك أنه ها يخلي باله منه .. بس اللي حصل ما يستحقش إنك تزعق في أخوك كده .. أو إنك تعلى صوتك عليا كمان ولا أيه؟ .. أنت فعلا تعبت في القصر عشان تعمله .. بس دي لعبة وممكن تعمل أحلي وأجمل منه ثاني عادي .. وده أخوك الصغير .. يعني لما يغلط فهمه غلطته بالراحة ولازم تكون حنين عليه.

حط مالك وشه في الأرض وفكر شوية وقال له .. عندك حق يا بابا .. أنا أسف .. قرب منه معاذ وقال له .. وأنا كمان أسف يا مالك أي كسرت لك القصر اللي عملته بالمكعبات وتعبت فيه .. أتكسف مالك من نفسه جدا .. وقال لمعاذ ما تزعش مني وسامحني لأنني زعقت لك .. ويلا بقي تعالي ساعدني نلم المكعبات ونعمل بيها قصر أكبر وأحلى من اللي أتكسر كمان.

حدوتة (١٥) جسمك ملكك

الهدف منها توعية الأطفال من خطر التحرش الجنسي

كان يا ما كان .. كان في زمان .. ولد شاطر ومؤدب اسمه حسن .. كان يبحب أصحابه جداً .. وبيبقي فرحان كل يوم وهو رايح المدرسة عشان ها يقابلهم .. وفي يوم من الأيام رجع حسن من المدرسة زعلان وحزين .. سألته مامته مالك يا حسن؟ .. قال لها حصل لي موقف النهاردة يا ماما وأصحابي قعدوا يضحكوا ويتريقوا عليا ويقولوا لي أنت بنوتة وبتكسف .. استغربت مامته جداً وقالت له ليه قالوا لك كده؟ رد حسن بصي يا ماما أنا ها أحكي لك الموقف كله وأنتي أحكي بنفسك أنا كده أتصرفت صح ولا لا عشان يتريقوا عليا .. قالت له قول يا حبيبي وأنا سامعك.

قال لها النهاردة في حصة العربي استأذنت من الميس عشان أروح الحمام وأرجع بسرعة .. ولما روت لاقيت الحمام زحمة جداً وفيه أولاد كثير .. أستنيت شوية لحد ما حد منهم يخرج ولاقيت جاسر صاحبي بينده لي وبيقول لي تعالي فيه واحد خرج والحمام فضي .. قولت له طيب أدخل أنت وأنا ها أدخل بعدك .. قال لي ما تيجي يا بني وتخلص عشان ما نتأخرش على الحصة .. كان عايزني أدخل معاه .. قولت له لا طبعاً .. مينفعش

.. أنا لازم أدخل لوحدي وأقفل الباب عليا كمان .. قعد يضحك ويتريق عليا ورجع قال لكل أصحابنا في الفصل .. وقعدوا يضحكوا ويتريقوا عليا هما كمان.

كمل حسن كلامه وهو مخنوق وحزين وقال مش أنتي يا ماما اللي قولتي لي أعمل كدة لما جيت أدخل المدرسة؟ .. مش أنتي اللي قولتي لي إني كبرت دلوقتي وما ينفعش أغير هومي قدام حد أو حد يشوف جسمي وإني أدخل الحمام لوحدي وأقفل الباب عليا .. مش أنتي يا ماما اللي قولتي لي أن مينفعش حد يشوف الأماكن اللي شاورتني لي عليها ساعتها على عروسة أختي جاسمين.

مش أنتي يا ماما اللي على طول بتقولي لي أن جسمك ملكك أنت وبس .. وأن ما ينفعش حد يلمس جسمك أو يضايك بأي حركة .. ولا أنا كمان ألمس جسم حد .. حتي بالأمانة ساعتها قولتي لي لو حد حظ أيده على جسمك أو عمل حركة تضايك .. زق أيده بسرعة وأجري بعيد عنه وصرخ وعلى صوتك وأنه عليك أنتي وبابا .. وكنتي دايمًا تقولي لي أن جسم كل واحد فينا ملكه هو بس.

كانت مامته بتسمع الكلام ده منه وهي مبسوفة جداً .. لأن حسن حافظ كلامها بالظبط وملتزم بتنفيذه .. وأخذته في حضنها وقالت له برافو عليك يا حسن أنا مبسوفة منك جداً وها أكافك على تصرفك ده لأنك أتصرفت صح .. أما أصحابك فاممكن يكونوا مش فاهمين الكلام ده .. أو مامتهم نسيت تقوله لهم .. يبقى لازم أحنأ نقول لهم ونفهمهم الصح علشان يعملوا زيك .. أو عى تزعل منهم .. وأنا بكرة ها أروح لمديرة المدرسة وأكلمها وأشرح لها الموقف وكل حاجة ها تبقي تمام ما تفلش.

وكانت المفاجأة لما مديرة المدرسة ندهت على حسن وطلبت منه أنه يقول الكلام اللي مامته علمته له في الميكرفون في الإذاعة المدرسية قدام المدرسة كلها علشان أصحابه يستفيدوا ويعملوا زيه .. فرح حسن جداً ومسك الميكرفون وأول جملة قالها جسمك ملكك أنت وبس.

حدوتة (١٦) سيف وسما في خطر

الهدف منها توعية الأطفال من خطر الاختطاف

كان يا ما كان .. كان في زمان .. بنت اسمها سما وولد اسمه سيف .. سيف وسما أخوات كانوا بيحبوا بعض أوي .. وكانوا الاتنين شاطرين جداً وأذكيا .. وفي يوم من خرجوا سما وسيف مع باباهم ومامتهم يشتروا شوية طلبات للبيت من السوبر ماركت اللي في المول .. قعدوا يتمشوا شوية وكانوا مبسوطين ويضحكوا ويهزروا مع بعض .. وفجأة ببص سما وسيف وراهم مالفوش مامتهم وباباهم.

أتخضوا ووقفوا في مكانهم وما بقوش عارفين يعملوا أيه .. سيف كان خايف جداً وسما كمان .. شاف سيف رجل كبير معدي جنبهم .. كان عايز يجري عليه ويسأله على مكان مامته وباباه .. سما قالت له استني يا سيف أنت هتعمل أيه؟ .. أنت نسيت ماما قالت لنا نتصرف إزاي لو توهدنا عنها قبل كدة .. لو ها نسأل حد يبقي نسأل حد موثوق فيه مش أي حد معدي جنبنا وخلص.

وقف سما وسيف في مكانهم في مكانهم ما تحركوش .. كان واقف رجل شكله مريب وبدأ يقرب منه لما شافهم واقفين لواحدهم وحس أنهم تايهين عن أهلهم .. قال لهم أزيكم يا حبابي .. مالكم واقفين كدة ليه؟ تعالوا معايا ماما و بابا بعنوني أخدمكم وأوصلكم لهم .. رد سيف وسما في صوت واحد لا يا عمو .. أحنأ مستنين ماما وبابا هما قالوا لنا ما تتحركوش من هنا وأحنأ هنجي لكم .. حس الرجل أن كذبه اتكشفت .. وقعد يفكر يقتنعهم أزاي أنهم يجوا معاه.

وفجأة هما واقفين شافت سما رجل أمن لابس لبس رجال الشرطة المعروف .. مسكت سما أيد أخوها سيف وجريت عليه بسرعة .. وحكوا له على اللي حصل .. رجل الأمن طمنهم وقال لهم ما تفلوش .. أنتم معايا في أمان .. وأكد باباكم ومامتكم دلوقتي بيدوروا عليكم .. افنكر سيف الورقة اللي مامتهم دايمًا بتديها لهم يحطها في

جيبه هو وسما كل ما يخرجوا .. طلعتها بسرعة وأداها لرجل الأمن وقال له .. أتفضل يا عمو الورقة دي فيها العنوان بتاعنا ورقم تليفون بابا وماما .. فرح جداً بيه رجل الأمن وقاله برافو عليك .. أنت كدة سهلت علينا المهمة .. انا كنت هأخذكم ونروح للبوابة وننده على باباكم ومامتكم في مكبر الصوت علشان يجوا يستلموكم مني.

أخذ رجل الأمن الورقة وأتصل برقم باباهم المكتوب وقال له هما موجودين فين .. جالهم باباهم ومامتكم في ثواني أخذوا سيف وسما .. وشكروا رجل الأمن جدا على مساعدته ليهم .. باباهم ومامتهم فرحوا جدا بيهم لأنهم أتصرفوا صح .. سألت سما مامتها هو أنتم كنتم فين يا ماما وأزاي بعدتوا عنا .. أحنا كنا ماشيين قدامكم وفجأة بنبص مش لاقيناكوا ورانا؟.

ردت مامتها أحنا كنا ماشيين عادي وشايفنكوا قدامنا .. وقابلنا ناس أصحابنا وقفوا علشان يسلموا علينا .. أحنا وقفنا لكن أنتم ما وقفنوش .. والظاهر كنتم مشغولين في الكلام واللعب مع بعض .. وفي ثواني مالقيناكمش قدامنا .. ومن ساعتها كنا بندور عليكم .. رد سيف عندك حق يا ماما .. أحنا غلطنا بعد كدة مش هنسيب أيديك أبداً أنتي وبابا .. حضنتهم مامتهم وقالت لهم .. بس بجد بجد برافو عليكم .. أنتم أولاد أذكيا وشاطرين وأتصرفتم مع الموقف صح طبعاً.

حدوته (١٧) أميرة في الصندوق

الهدف منها تعليم الأطفال الخصوصية والحفاظ على الأسرار

كان يا ما كان .. كان في زمان .. بنوثة جميلة ورفيقة ومؤدبة اسمها أميرة .. كانت أميرة بتسمع كلام مامتها وباباها ولما دخلت المدرسة بقي عندها أصحاب كثير أوي وكل أصحابها كانوا بيحبوها .. وهي كمان بتحبهم وبتقعد تتكلم معاهم وتحكي لهم عن نفسها .. وهي بتعمل أيه في البيت من ساعة ما بتروح من المدرسة لحد بتنام بليل .. وبالتدريج بدأت أميرة تحكي لأصحابها عن كل حاجة بتحصل في البيت .. سواء تخصصها أو تخصص مامتها وباباها .. يعني تقول لأصحابها مثلاً أن مامتها أشرت لبس جديدة.

وأ تعود أصحابها في المدرسة يسألوها كل يوم أكلتي أيه أمبارح؟ خرجتي فين مع مامتك وباباكي؟ .. وهي تجاوبهم بكل صراحة .. مرة في مرة أتعودت أميرة تحكي وتتكلم مع أي حد وتقول له على كل اللي بيحصل في بيتهم بالتفصيل .. وفي يوم من الأيام سمعت أميرة مامتها بتتكلم مع باباها أن في واحدة صاحبة مامتها عايزة تيجي تزورهم في البيت .. وقالت له كمان أنها مش بتحب صاحبها دي لأنها بتقعد تتكلم على باقي أصحابهم وتقول عليهم كلام مش حلو .. وهي مش بتحب كدة لأن ده حرام.

ولما جت لهم صاحبة مامتها البيت دخلت مامتها المطبخ علشان تجيب لها عصير .. وبسرعة قعدت أميرة جنب صاحبة مامتها .. وفضلت تحكي لها على الكلام اللي سمعته دار بين مامتها وباباها .. صاحبة مامتها زعلت جداً وقامت فتحت الباب ومشيت.

جت مامتها بسرعة وسألته هو في أيه يا أميرة؟ هي طنط راحت فين؟ حكمت أميرة لمامتها على كل اللي حصل .. اتضايقت مامتها جدا منها وقالت لها أنتي جبتي الكلام اللي قولتيه لطنط ده منين؟ قالت لها سمعتك وأنتي بتتكلمي مع بابا .. زعلت مامتها جدا منها .. واستغربت أميرة وقالت لها أنتي زعلتي ليه يا ماما؟ أنا اتكلمت مع طنط صاحبك عادي زي ما بتكلم مع أصحابي في المدرسة وبحكي لهم على كل حاجة.

أندهشت مامتها جداً وقالت لها معقول يا أميرة .. بس دي كدة غلط خالص .. ساعتها بس فهمت مامتها أن أميرة كانت بتقع في غلطة كبيرة أوي الفترة اللي فاتت .. وقعدت مع أميرة وقالت لها بصي يا حبيبتني .. أنا ها سامحك المرة دي لأنك كنتي بتعملي حاجة غلط .. بس أنتي ما كونتيش تعرفي أنها غلط .. تعرفي يا أميرة .. بيتنا اللي أحنا عايشين فيه ده عامل زي الصندوق والباب بتاع شقتنا ده هو الغطاء بتاع الصندوق .. وأي حاجه بتحصل جوة الصندوق ده تعتبر سر.

كانت أميرة مركزة جداً في كلام مامتها اللي كملت وقالت لها .. الصندوق بتاعنا مدام مقفول بالغطا بتاعه ومأحدش من الناس اللي برة شايف أو سامع اللي بيحصل جواه .. بيبقي مينفعش احنا نحكي ونقول للناس إللي بيحصل جوة الصندوق بتاعنا. لأننا كدة بنطلع أسرارنا كلها اللي برة الصندوق بتاعنا .. هزت أميرة راسها وقالت .. خلاص يا ماما أنا فهمت أنى ما ينفعش أحكي لأصحابي أو لأي حد اللي بيحصل في بيتنا .. أنا كدة كنت بعمل حاجه غلط .. بس من النهاردة مش ها أقول لأي حد على اللي بيحصل جوة الصندوق بتاعنا خالص.

سكتت أميرة شوية وقالت لمامتها .. طيب لو حد سألني عن أي حاجه بتحصل جوة الصندوق بتاعنا .. أرد أقول ايه بقي؟ ردت مامتها تقولي له أسأل ماما لأنك طفلة صغيرة .. اللي عايزة يسأل عن أي حاجه يجي يسألني أنا أو بابا.

حدوتة (١٨) النمر مش ملك الغابة

الهدف منها توعية الأطفال بالتجنب الغرور

كان يا ما كان .. كان في زمان .. نمر مغرور عايش في غابة بيحكمها الأسد ملك الغابة .. وفي يوم من الأيام قعد النمر المغرور يفكر أشمعنا الأسد اللي بيبقي ملك الغابة .. ليه مش أنا اللي أبقي ملك الغابة .. وأحكم الغابة دي كلها .. أنا قوي زي زيه وما فيش فرق بينا .. قرر النمر أن يتكلم مع كل حيوانات ويبلغهم بقراره الجديد .. أن هو ها بيبقي ملك الغابة مش الأسد .. وهو ماشي كل ما يقابل حيوان يقول له من النهاردة أنا ملك الغابة مش الأسد.

كل الحيوانات استغربت من كلامه .. الفيل قال له أنت أتجننت؟ أزاى يعني؟ الأسد هو ملك الغابة هو أقوى واحد فينا .. والضبع قال له لا طبعا يا نمر .. الأسد بيقدر يحميننا وبيصطاد لنا الفرائس وبيوفر لنا الأكل بتاعنا .. حتى الزرافة والقرود رفضوا وقالوا له لا طبعا الأسد أقوى منك .. وهو اللي يستحق لقب ملك الغابة .. غضب النمر منهم وقال لهم بس أنا شايف إني أقوى منه وأقدر أحميكم لو أي صياد أو عدو هجم على الغابة بتاعتنا.

زل النمر جداً وقال لهم .. كدة .. طيب أنا همشي وأسبب لكم الغابة عشان تعرفوا قيمتي .. وتتأكدوا أن أنا اللي استحق لقب الملك .. وجري النمر المغرور بسرعة لبعيد لحد ما خرج برة الغابة .. وفجأة لقي نفسه في مكان غريب أول مرة يشوفه .. قعد يجري أسرع وأسرع .. وبعدين وقف واتلفت حواليه .. لقي نفسه بعد عن الغابة أوي .. خاف جداً لما لقي نفسه في مكان غريب لوحده .. وكمان تعب من الجري وجاع وعطش وقعد يدور على أكل ياكله مالمقاش أو مايه يشربها برضه مالمقاش.

فجأة ظهر له صياد رمي عليه سهم .. كان هيجي في رجله .. النمر كان مرعوب لأن حياته في خطر .. دور على مكان يستخبي فيه لحد ما الصياد يمشي .. وكان مش قادر يمشي من شدة التعب .. وقعد يلوم نفسه .. أزاى عمل كدة؟ وليه كان مغرور أوي وشايف نفسه أقوى من الأسد وقال لنفسه .. أديني أهو خايف ومرعوب ومش قادر حتى أدافع عن نفسي أزاى بقى كنت ها أبقي ملك الغابة؟ أنا كنت قوي بأصحابي الحيوانات اللي كانوا حواليا .. وقعد يقول لنفسه يا رييتي أرجع الغابة تاني .. يا رييت أرجع أعيش وسط أصحابي الحيوانات تاني.

وقعد يحاول يفكر الطريق عشان يقدر يرجع الغابة تاني .. لحد ما وصل وكان تعبان جداً وأول ما وصل أعتذر لكل الحيوانات عن غروره .. وقال لهم أنه عرف قيمتهم لما بعد عنهم وسابهم وبقي وحيد .. وقال لهم .. أنا كنت غلطان لما سببت الغابة ومشيت .. يا رييت .. تسامحوني .. وتسمحوا لي أرجع أعيش وسطكم .. كل الحيوانات سامحته .. وجريوا بسرعة جابوا له أكل وماية.

شكر النمر أصحابه الحيوانات وقال لهم أنتم كان عندكم حق .. أنا فعلا ما ينفعش أكون ملك للغابة .. وراح للأسد وقال له .. أنت فعلا يا أسد تستحق تبقي ملك الغابة .. رد الأسد وقال له مش مهم مين فينا يكون الملك .. كلنا هنا أخوات في الغابة .. وكل واحد فينا له دور بيقوم بيه.

حدوتة (١٩) أسنان ساندي

الهدف منها توعية الأطفال بمرحلة تبديل الأسنان اللبنية

كان يا ما كان .. كان في زمان .. بنت اسمها ساندي .. كانت ساندي بنت جميلة ورقيقة .. بتهم جداً بنظافتها وشكلها .. وكانت بتحافظ على نظافة أسنانها على طول .. وكانت بتغسلها بعد الأكل وقبل ما تنام بالفرشاة والمعجون .. وكانت فرحانة جداً أن أسنانها على طول بيضة ونظيفة وبتلمع .. ولما تيجي تتصور تبتسم ابتسامة كبيرة عشان تبين أسنانها الجميلة في الصورة .. وكانت على طول تنصح أصحابها أن هما كمان لازم يغسلوا أسنانهم بالفرشاة والمعجون عشان تبقى جميلة ونظيفة .. وكانت بتستغرب جداً لما تلاقي أطفال صغيرين أسنانهم مسوسة ومتكسرة ومش محافظين عليها .. وبياكلوا حلويات كثير وبيروحوا كثير عند دكتور الأسنان عشان يعالجهم.

ولما كبرت ساندي وبقي عندها ٦ سنين .. حصلت لها حاجة غريبة .. مرة وهي بتاكل ساندوتشات في المدرسة لاقت سنة من أسنانها بتتهز وبتتحرك من مكانها وشكلها هتقع .. وأتخضت جداً وكانت خايفة ومرعوبة .. معقول سنانها الجميلة اللي هي بتحافظ على نظافتهم دايماً هتقع وتبقي ناقصة سنة .. أول ما رجعت البيت جريت على مامتها وقالت لها ألقيني يا ماما ألقيني؟

مامتها قالت لها مالك يا حبيبتي .. ردت ساندي سنتي يا ماما بتتهز جامد وهاتقع .. مامتها قالت لها وريني كدة .. ولسة مامتها بتحط أيديها على السنة اللي بتشاور لها عليها .. لاقيتها وقعت .. ساندي قعدت تعيط .. وتقولها أعمل أيه دلوقتي يا ماما .. وهأكل أزاوي وكمان شكلي ها يبقى وحش .. مامتها طلبت منها تهدي عشان تعرف تفهمها .. وقالت لها ما تزعليش وما تخافيش يا ساندي .. المفروض أنك تفرحي .. لأنك كدة كبرت وبتدلي أسنانك .. لأن الأسنان اللي عندك دي هي أسنان لبنية .. يعني الأسنان اللي طلعت لك وأنتي بيبي صغير عشان الأسنان دي بتبقى ضعيفة .. عشان كدة لما بتكبري بتقع وبتطلع مكانها أسنان جديدة حجمها أكبر وأقوى .. وهي دي اللي ها تعيشي بيها طول حياتك .. يعني كل أسنانك وضروسك دي هاتقع وتبديل وبتطلع مكانها أسنان وضروس تانية

قالت لها يعني أنا ها يطلعني سنة جديدة مكان اللي وقعت دي بجد .. مامتها قالت لها أن شاء الله يا حبيبتي .. بس أهم حاجة بقي في الفترة الجاية ما تجيبش لسانك كثير مكان السنة اللي وقعت دي .. عشان أسنانك الجديدة ما تتعوجش وتطلع في مكانها المظبوط .. وكمان لازم تشربي لبن كثير وتاكل بيض وجبن كثير لأن الحاجات دي فيها كالسيوم وجسمك محتاجه كثير الفترة دي عشان تطلع أسنانك الجديدة قوية وجميلة .. وكمان لازم تستمري بقي في غسل أسنانك الجديدة بالفرشاة والمعجون باستمرار لأن زي ما قولت لك هي دي الأسنان اللي هاتعيشي بيها باقي العمر كله.

حدوتة (٢٠) كندة والعصافير

الهدف منها توعية الأطفال بالرفق بالحيوان

كان يا ما كان .. كان في زمان .. بنوتة جميلة ورقيقة اسمها كندة .. كانت كندة بتحب الطيور جداً .. وفي يوم من الأيام صحيت كندة على صوت صوصوة عصافير عالي جاي من ناحية البلكونة .. جريت بسرعة ناحيتها بس مش شايفة حاجة .. ندهت على مامتها عشان تفتح لها البلكونة ويدخلوا يشوفوا الصوت ده جاي منين .. ولما دخلوا اكتشفوا أن صوت الصوصوة طالع من كارتونة قديمة مامتها كانت حطها في البلكونة فيها حاجات مش بتستخدمها .. واكتشفوا أن فيه عصفورتين عاملين عش صغير جوة الكرتونة وكان فيها بيضتين فقسوا وطلع منها عصفورتين صغيرين.

فرحت كندة جداً ببيهم .. وبقت بتصحى على صوتهم كل يوم وبتتابعهم من بعيد .. وبتتفرج عليهم وباباهم ومامتهم بيطيروا يجيبوا لهم الأكل ويجوا يأكلوهم في بوقهم .. لأنهم لسنة صغيرين وكمان مش بيعرفوا يطيروا .. وفي يوم من الأيام صحيت كندة على صوت مطر شديد .. وصوت الرياح كان مخيف جريت بسرعة على العصافير علشان تتطمئن عليهم .. لكن للأسف لاقيت العصفورتين الأب والأم واقعين في الأرض وميتين .. وأولادهم الصغيرين في العش بيصوصوا وشكلهم جعانيين .. قعدت تعيط وندت لمامتها وهي مضايقة ليه حصل كدة يا ماما .. ليه ماتت العصافير الكبيرة وسابوا أولادهم الصغيرين .. مين اللي هياكلهم؟ كدة ها يموتوا هما كمان.

مامتها طمنتها وقالت لها أن ربنا هو اللي بيرزقنا وبأكلنا وبشربنا وكل حاجة .. فا متقفيش ربنا قادر أنه يرزقهم هما كمان .. لأن ربنا قادر على كل شئ .. لكن كندة فضلت تعيط وهي زعلانة ومتضايقة .. وتقولها أزاى بس يا ماما أزاى؟ رن جرس الباب .. كانت جارتهم اللي ساكنة تحتهم جاية تظمن عليهم .. ولما عرفت السبب اللي مخلي كندة حزينة أوي كدة .. قالت لهم أنا كمان عندي عصافير عاملين عش في البلكونة تحت وعندها عصفورتين صغيرين ولادهم .. وفجأة جات لها فكرة جميلة جداً .. قالت لهم طيب أيه رأيكم لو أخذت العصفورتين الصغيرين دول وحطيتهم في العش بتاع العصفورتين اللي عندي .. وكدة ممكن العصافير الكبيرة يأكلوا الأربعة الصغيرين كأنهم ولادهم .

فرحت كندة جداً وقالت لها يا ريت يا طنط .. وراحت مع جارتهم تساعدها في نقل العصافير الصغيرين .. واستنوا لما العصافير الكبار خرجوا من العش يدوروا على أكل لأولادهم .. وراحوا حاطين العصفورتين الصغيرين جنب التانيين ودخلوا بسرعة .. ووقفوا وراء باب البلكونة يتابعوا ها يحصل أيه .. ولما رجع العصافير الأم والأب بالأكل .. بدأوا يأكلوا العصافير الأربعة في بوؤهم ويهتموا ببيهم .. فرحت كندة ومامتها وجارتهم جداً لأن الفكرة بتاعتهم نجحت ووقفوا يتفرجوا على العصافير الصغيرين الأربعة وهما بياكلوا لحد ما شبعوا .. وساعتها بس كندة حضنت مامتها وقالت لها كان عندك حق يا ماما لما قولتي أن ربنا قادر يرزقهم بالأكل والشرب زي ما بيرزقنا أحنا كمان.

حدوتة (٢١) سيف يتعلم معني الأمانة

الهدف منها تعليم الأطفال معني الأمانة

كان يا ما كان .. كان في زمان .. ولد اسمه سيف .. كان سيف ولد جميل ومؤدب .. كانت مدرسته قريبة من البيت .. ومامته بتوصله كل يوم الصبح للمدرسة وترجع عشان تاخده وقت الخروج .. وفي يوم وهو مروح من المدرسة مع مامته .. كانت احتفالات رأس السنة الجديدة قربت وكان في بائع واقف جنب المدرسة بيبيع بالونات وماسكات وطرطير .. عجب سيف أوي ماسك بابا نويل وطارطور جميل .. أستأذن مامته أنها تشتريهم له .. مامته وافقت ووقفت عند البائع واشترت الطارطور والماسك .. وطلبت منه يحطهم في كيس بلاستيك.

فرح جدا سيف ببيهم ولما وصل البيت جه يطلعهم من الكيس لقي طارطور واحد وماسكين كانوا لازقين في بعض .. فرح أوي سيف وجري على مامته يقولها .. مامته اتضايقت وقالت له أكيد البائع ما أخذش باله .. وحط اتنين بدل واحد .. رد سيف وقال لها وفيها أيه يا ماما .. أنا حظي حلو .. كاتنا اشترينا واحد وأخذنا الثاني هدية .. قالت له لا طبعا دي أمانة ولازم نرجعها لصاحبها .. لازم نعدي بكرة عليه ونقول له وندفع له تمن الواحد الزيادة أو نرجعه له.

استغرب سيف من كلام مامته وقال لها ليه بس يا ماما هو اللي حطه بالغلط مش أحنا اللي أخذناه من غير ما يشوفنا يعني .. قالت له يا سيف يا حبيبي دي حاجة ودي حاجة تانية .. هو فعلا حطه بالغلط لكن أحنا لازم يكون عندنا أمانة ونرجع الحاجة لصاحبها مدام عارفين مين صاحبها .. عارف يا سيف سيدنا محمد عليه الصلاة والسلام كان لقبه أيه؟ .. قال لها أيه يا ماما؟ .. قالت له كان ملقب بالصادق الأمين .. لأنه ما كانش بيقول إلا الصدق .. وكان أمين ومحبوب من الناس وكانوا بياثمنوه على فلوسهم وعلى أي شئ غالي عندهم .. عمره ما

أخذ حاجة مش بتاعته .. وأنت عارف أن سيدنا محمد هو قدوة لكل المسلمين .. ولازم نبقي زييه في أخلاقه الجميلة دي.

أقتنع سيف بكلام مامته .. وتاني يوم وهما راجعين من المدرسة عدى على البائع .. وقاله سيف على اللي حصل ودفع له الفلوس .. البائع فرح جداً وقال له أنا متشكر جداً ليك .. أنت بجد ولد أمين .. أتبسط سيف من كلام البائع.

ومرت الأيام وطلبت مامة سيف منه أنه ينزل يشتري لها طلب ضروري من السوبر ماركت اللي تحت العمارة .. وأديت له الفلوس وقالت له بص يا سيف .. أنت معاك عشرة جنيهه والحاجة اللي أنا عايزاها بخمسة جنيهه ها تدي الفلوس للبائع وهيدي لك الباقي كام؟ رد سيف بسرعة بعد ما حسبها .. خمسة جنية يا ماما .. قالت له برافو عليك يا حبيبي .. وفعلاً أدى سيف الفلوس للبائع لكن حصلت حاجة غريبة .. البائع أدى له الباقي ١٥ جنيهه .. سيف وقف مستغرب وقال أزاي ده المفروض الباقي خمسة جنيهه أعمل أيه دلوقتي؟ .. الظاهر أن البائع ما أخذش باله .. أكيد فيه حاجة غلط؟ أنا لازم أقول له وأرجع له الفلوس الزيادة.

لما رجع للبائع وقال له .. اتبسط البائع منه جدا قال له أنا أسف يا ابني .. أنا افتكرتك أدتني ٢٠ جنيهه مش ١٠ جنيهه جداً .. ربنا يحميك انت ولد أمين .. طلع سيف لمامته وهو طائر من الفرحة أنه بقي أمين لأنه بيعمل زي ما بيأمرنا الدين الإسلامي وزي رسولنا الكريم عليه الصلاة والسلام.

حدوتة (٢٢) كريم وآداب الطعام

الهدف منها توعية الأطفال بآداب الطعام

كان يا ما كان .. كان فيه زمان .. ولد اسمه كريم .. كريم كان ولد جميل ونشيط .. لكن مشكلته كلها كانت في وقت الأكل .. لأنه لما كان بيجي ياكل كان بيعمل شوية تصرفات وحشة جداً جداً .. رغم أنه لما كبر وبقي عنده ثلاث سنين .. بدأت مامته تدربه على أنه يعتمد على نفسه ويأكل بنفسه .. قالت له ساعتها بص يا كريم .. الأكل دة له آداب .. رسولنا الكريم سيدنا محمد صل الله عليه وسلم وضحها لنا .. ولازم نلتزم بيها .. ودي تعتبر الأساس وهي سمي الله وكل بيمينك وكل مما يليك.

يعني لازم قبل ما نبدأ نأكل نقول "بسم الله الرحمن الرحيم" ولما نخلص الأكل نقول "الحمد لله الذي أطعمنا وسقانا وجعلنا مسلمين" .. ولما نيجي ناكل نستخدم أيدينا اليمين في الأكل .. وناكل من الأكل القريب منا وقدامنا على السفرة .. ده غير أن فيه شوية آداب تانية لازم نراعيها أثناء الأكل .. زي مثلا .. أننا لازم نغسل أيدينا قبل الأكل وبعد الأكل .. وأننا نقفل بوؤنا وأحنا بنمضغ الأكل .. وما نطلعش صوت عالي من بوؤنا وأحنا بناكل .. ونحط في بوؤنا كميات بسيطة من الأكل علشان نعرف نمضغها كويس .. مش نحط كمية كبيرة في بوؤنا ونقعد نمضغ فيه وما نبقاش عارفين نبلعه .. وألا ساعتها يبقى أيه الفرق بينا كبني آدمين وبين الحيوانات .. وكمان لو في نوع أكل ما بنحبش ناكله نسيبه وناكل أي أكل تاني من الموجود .. ما ينفعش نقول على نعمة ربنا أنها وحشة.

وبرغم أن مامة كريم كانت على طول بتفكره بالحاجات دي في كل مرة يجي يأكل فيها كان دايمًا بينسى .. ودي أكثر حاجة كانت بتزعل مامته وباباه منه .. ولما كبر كريم وبقي عنده أربع سنين ودخل المدرسة .. وبقي عنده أصحاب .. وفي توقيت معين هو وزمائله بيطلعوا أكلمهم وياكلوا فيه .. بدأ أصحاب كريم ياخذوا بالهم من عادته الغلط اللي بيعملها وهو بياكل .. وبدأوا يتضايقوا منه .. ويبعدوا عنه .. لأن منظره كان بيبقى وحش أوي .. خاصة لما بيتكلم وهو بيمضغ الأكل ويفتح بوؤه .. ولا الأصوات العالية اللي كان بيعملها لما ياكل .. ولا لما كان بيمسك السنوتشات وأيده مش نظيفة وياكل بيها .. أصحابه بقوا بيقرفوا منه جدا .. وطلبوا من المدرسة تنقلهم من جنبه.

ولما المدرسة بتاعتهم عرفت منهم السبب .. أخذت كريم على جنب لوحده وقعدت تفهمه .. أن الأكل له آداب لازم نلتزم بيها .. ولسه ها تشرح له أيه هي الآداب دي .. قال لها أنا أسف .. أنا فعلاً غلطان .. أنا مامتي كانت دايمًا تقول لي كل الكلام ده .. لكن أنا اللي ما نفذتش كلامها .. دلوقتي بس عرفت ماما وبابا كانوا بيزعلوا مني ليه لما مكنتش بملتزم بآداب الطعام .. ولما رجعت البيت اعتذر لمامته ووعدها أنه مش ها يعمل كدة تاني .. ردت مامته وقالت له أنه لازم يلتزم بآداب الطعام مش بس عشان مامته وباباه وأصحابه ما يزعلوش منه ويضايقوا .. لا وعشان ربنا كمان يرضي عنه ويحبه.

حدوتة (٢٣) مروان و آداب الاستئذان

الهدف منها تعليم الأطفال آداب الاستئذان

كان يا ما كان .. كان فيه زمان .. ولد اسمه مروان .. كان مروان ولد جميل ومؤدب .. كان بيحب أوي يلعب مع أحمد زميله في المدرسة وكمان جارهم في العمارة .. كان مروان بيستأذن مامته أنه ينزل يلعب معاه وساعات كان أحمد هو اللي بيطلع له يلعبوا سوا .. وفي يوم من الأيام نزل مروان لأحمد عشان يلعب معاه .. ورن الجرس لكن أحمد ما فتحش الباب .. رن الجرس مرة كمان بردو ما فتحش .. قعد يخبط على الباب جامد بردو ما حدش فتح له .. طلع تاني شقته وهو زعلان جداً .. ولما مامته سألتها مالك يا مروان؟ قال لها مفيش يا ماما .. أصل رنيت الجرس كثير على أحمد وخبطت على الباب جامد أوي لكن ما حدش فتح لي.

قالت له ما تزعلش يا حبيبي .. ممكن يكونوا نايمين أو مش موجودين .. أو ممكن يكون عندهم ظروف ومش ها يفتحوا لك .. أنت ما تعرفش ظروفهم أيه؟ .. وأنا من رأيي بعد كدة قبل ما تنزل عند أحمد تكلمه في تليفون البيت .. وتخليه يسأل مامته الأول ويستأذنها إذا كان يفتح تنزل تلعب معاه ولا لا؟ بص مروان لمامته وهو زعلان بردو وقال لها حاضر يا ماما .. اللي حضرتك تشوفيه.

راح مروان تاني يوم المدرسة وهو عمال يفكر يا ترى أحمد ما فتحش ليه؟ يا ترى كان نايم؟ ولا خرج؟ ولا ممكن يكون جوه وسمعي وأنا بخبط بس ما فتحش عشان مش عايز يلعب معاها؟ وكان مستني يشوف أحمد عشان يسأله .. ولما بدأت حصة الدين .. دخلت ميس هاجر الفصل وسلمت على الأولاد .. وقالت لهم النهاردة يا ها نتكلم عن آداب الاستئذان .. كل الأولاد انتبهوا لكلام ميس هاجر .. كملت كلامها وقالت لهم .. بصوا يا أولاد الدين بتاعنا حاطت لنا شوية آداب للاستئذان لو إلترامنا بيها .. حياتنا ها تبقى أحلى .. وها نبقي مبسوطين أكثر.

أولاً لما نروح نزور أي حد نخبط على الباب بالراحة مش بعنف .. ونخبط ثلاث مرات بس .. لو اللي جوه البيت فتحوا وسمحوا لك تدخل .. يبقى تمام .. هنا سألت مروان ميس هاجر .. طيب ولو ما فتحوش أعمل أيه؟ .. ردت عليه وقالت له لو ما فتحوش يبقى أرجع وأنا فرحان مش غضبان وزعلان .. لأن أنا ما عرفش ظروفهم أيه .. ممكن يكونوا نايمين أو خرجوا ومش موجودين .. ولو اللي جوه البيت سألني أنت مين؟ ما قولش أنا وأسكت .. لازم أقول اسمي يعني .. مثلاً أقول أنا هاجر .. وأول ما يفتحوا الباب لازم أسلم على اللي فتح الباب وأقول السلام عليكم .. واستأذن قبل ما أدخل.

سألت يارا ميس هاجر .. طيب لو أنا جوة الشقة وحد قافل على نفسه باب الأوضة لازم أخبط واستأذن بردو ولا أفتح الباب علي طول؟ .. ردت ميس هاجر لا طبعاً يا يارا .. لازم أخبط واستأذن لأن ممكن يكون في حد بيغير هدمه مثلاً .. يعني لازم استأذن قبل ما أدخل على بابا وماما أوضتهم لو الباب مقفول .. لازم أخبط على الباب بالراحة وأسألهم ممكن أدخل؟ .. لكن يا أولاد في أماكن ممكن ادخلها من غير ما استأذن .. وهي الأماكن اللي ما فيها ناس عايشين أو ساكنين فيها.

سأل حسام .. بجد يا ميس هاجر؟ زي أيه الأماكن دي؟ .. ردت وقالت زي المسجد مثلاً .. مش لازم استأذن أو أخبط على الباب قبل ما أدخل أو المحلات لما أجي اشتري حاجه مثلاً بدخل من غير ما استأذن .. كان مروان بيستمع كلام ميس هاجر باهتمام وتركيز .. ولما قابل صاحبه أحمد ما سألهوش ما فتحوش الباب امبارح ليه ..

بالعكس .. كان مكسوف جدا من نفسه .. لأنه ماكنش ملتزم بأداب الاستئذان لما زاره .. واتضايق من نفسه أكثر كمان لما أحمد قال له أن جدته كانت تعبانة جداً امبارح .. وأنهم راحوا عشان يزوروها ويطمنوا عليها .. ساعتها أتأكد أن مامته كان عندها حق لما قالت له أنت ما تعرفش ظروفهم أيه .. وقرر مروان من ساعتها أنه يلتزم بأداب الاستئذان اللي شرحتها لهم ميس هاجر في الفصل .. لأنه استفاد منها جدا .. وعرف حاجات جديدة.

حدوتة (٢٤) معاذ وآداب الركوب

الهدف منها نوعية الأطفال بأداب ركوب المواصلات

كان يا ما كان .. كان فيه زمان .. ولد اسمه معاذ .. كان معاذ ولد مؤدب .. ويحب يستفسر من مامته عن أي حاجة ما يعرفهاش .. وفي يوم من الأيام مامته صحتة من النوم وقالت له .. يا معاذ قوم أتوضى وصلي وألبس هدمك بسرعة عشان ها نروح عند تيته .. معاذ استغرب وسأل مامته .. مش بابا ها يودينا بالعربية بالليل لما يرجع من الشغل؟ .. قالت له لا يا حبيبي بابا كلمني في التليفون وقال لي أنه مش ها يفدر يودينا بالعربية النهاردة .. لأن عنده شغل كثير أوي وها يتأخر علينا فها أروح أنا وأنت مع بعض بمترو الانفاق.

سأل معاذ مامته .. هو أيه المترو ده يا ماما قالت له المترو ده يا حبيبي وسيلة مواصلات عامة زي القطار وزي الأتوبيس كدة .. بينقل الناس من مكان لمكان يس بيمشي تحت الأرض على قضبان حديد شبة قضبان القطار بالظبط .. فرح معاذ جداً .. و حس أنها ها تبقى تجربة جديدة ومفيدة لأنه ها يشوف وسيلة مواصلات جديدة بالنسبة له .. لأنه على طول ما بيخرجش غير مع باباه بالعربية بتاعتهم.

أول ما ركب معاذ مترو الانفاق مع مامته لاقاها بتقول السلام عليكم ورحمة الله وبركاته .. استغرب معاذ وسأل مامته أنتي بتسلمي على مين يا ماما .. هو أنتي تعرفيهم؟ .. قالت له لا يا معاذ يا حبيبي دي تحية الإسلام بنقولها لبعض دايماً .. حتى لو لحد ما نعرفوش مش سيدنا محمد عليه الصلاة والسلام أمرنا إننا ننشر السلام ما بينا .. قال لها ممام فهمت يا ماما .. ولما لاقوا كراسي فاضية راحوا وقعدوا فيها .. شوية وسمع معاذ مامته بتقول دعاء غريب أول مرة ياخذ باله منه "سبحان الذي سخر لنا هذا وما كنا له مقرنين وإنا إلي ربنا لمنقلبون" .. سأل معاذ مامته بسرعه أنتي بتقولي أيه يا ماما؟ .. وإيه الدعاء الغريب ده؟ .. قالت له ده يا معاذ اسمه دعاء الركوب .. المفروض نقوله لما نيجي نركب أي وسيلة نقل .. أنا بقوله على طول لما بنركب عربيتنا بس الظاهر إنك بتبقى قاعد ورا ما بتسمعنيش.

وكمكان المفروض لما نيجي نركب براحة من غير ما نرزق بعض بحجة إننا مثلاً مستعجلين عشان ماحدث يأذي حد وهو بيطلع أو بينزل .. بص معاذ لمامته وسألها ممكن يا ماما أبص من الشباك وأطلع راسي عشان أشوف المترو وهو ماشي على القضبان الحديد .. ردت مامته وقالت له لا يا حبيبي ما ينفعش طبعاً .. كدة خطر عليك جداً .. المفروض إننا وأحنا راكبين أي وسيلة مواصلات ما نطلعش أيدينا أو رأسنا أبداً من الشباك .. لأنها بتبقى ماشية بسرعة .. وممكن نتخط في أي حاجة لا قدر الله .. لكن ممكن نتفرج من ورا الإزاز.

وقف المترو في المحطة وركبت واحدة كبيرة في السن وشايلة شنطة ثقيلة وكان شكلها تعبانة أوي .. مامه معاذ قامت بسرعة من مكانها وخلتها تقعد مكانها... قرب معاذ من ودان مامته وهمس بصوت واطي وقال لها .. يا ماما أنتي قومتي ليه من مكانك وقعدتيها هي قريبتنا؟ ردت مامته وقالت له لا يا معاذ .. قال لها أمال قومتي لها ليه؟ .. قالت له يا حبيبي دي واحدة كبيرة في السن وشكلها مريضة يبقى من الرحمة أن أنا أقوم وأقعدتها تستريح .. مش الدين بتاعنا أمرنا أننا نعطف على الصغير ونحترم الكبير .. بصيت له مامته شوية كدة وقالت له تعرف يا معاذ أنك بأسئلتك دي كلها خلينتي أقول لك آداب الركوب وأنا مش واخدة بالي.

استغرب معاذ وقال لها بجد يا ماما؟ هو فيه آداب لركوب المواصلات؟ قالت له طبعاً يا معاذ .. الدين بتاعنا حاطط لنا آداب لكل صغيرة وكبيرة في حياتنا لو إلتزامنا بجد بيها حياتنا هتبقى أحلى .. وقف المترو وجت

المحطة اللي المفروض ينزل فيها معاذ ومامته .. كان معاذ فرحان جداً أنه ركب مواصلة جديدة وأتعلم من مامته كمان معلومات مفيدة وآداب ركوب المواصلات.

حدوتة (٢٥) إياد وآداب الطريق

الهدف منها توعية الأطفال بآداب الطريق

كان يا ما كان .. كان فيه زمان .. ولد اسمه إياد .. كان إياد ولد جميل ومؤدب ورياضي .. كان بيحب رياضة الكاراتية جدا هو ومحمد صاحبه .. وكانوا على طول بيروحوا تدريب الكاراتية في ميعاده وما بيتأخروش عليه .. وفي مرة من المرات وهما ماشيين في الشارع ورايحين التدريب .. شاف إياد قشرة موز مرميه على الأرض .. وطى بسرعة وشالها من على الأرض .. ودور على سلة ورمها فيها .. إستغرب محمد من تصرف إياد لكنه ما اتكلمش .. شوية وشاف إياد حنة إزاز مكسورة ومرميه على الأرض .. طلع منديل من جيبه ومسكها براحة ودور على أقرب سلة ورمها فيه.

محمد صاحبه ابتدي يتضايق منه .. ومشىوا شوية وبعدين شافوا مجموعة أحجار مرميه في الطريق .. وقف إياد وشالها وركنها جنب الرصيف .. اتضايق محمد صاحبه منه أكثر .. وقال له بسخرية .. فيه أيه يا إياد؟ .. هو أنت بقيت شغال عامل نظافة ولا أيه؟ ضحك إياد وقاله لا يا محمد .. ده أنا لما لاقيت قشرة الموز خوفت حد يتزحلق فيها ويقع على الأرض .. ولما لاقيت الإزاز المكسور خوفت حد يدوس عليه وهو مش شافيه ورجله تتعور .. ولما لاقيت الأحجار دي مرميه في وسط الطريق خوفت ممكن حد رجله تدوس عليها ويتأذي بسببها .. هز محمد راسه وقال له ماشي يا إياد .. يلا بقى بسرعة أحسن نتأخر على ميعاد التدريب.

مشىوا شوية .. وبعدين قابلتهم بنوتة وفتهم وسألتهم لو سمحتوا تعرفوا فين مكتبة الطفل؟ رد إياد وقال لها أيوه أنا عارف طريقها .. وقف إياد وقعد يشرح لها إزاي توصل للمكتبة .. كان محمد متضايق جداً .. وأول ما إياد خلص كلامه مع البننت ووصف لها الطريق ومشيت .. محمد قال لإياد فيه أيه يا إياد؟ .. هو أنت بقيت شغال مرشدا؟ بتوصف للناس الطريق .. أحنا كدة ها نتأخر على ميعاد التمرين والكابتن ها يزعل مننا وها يزعلنا رد إياد وقال له لا ما تخافش إن شاء الله ها نلحق وهوصل في ميعادنا.

مشىوا شوية وبعدين عدوا على جماعة واقفين بيتكلموا مع بعض .. قال لهم إياد بصوت عالي السلام عليكم .. استغرب محمد وسأله هو أنت تعرف الناس دي؟ .. رد إياد وقاله لا ما عرفهمش .. قاله أمال بتسلم عليهم ليه .. ومشىوا شوية وبدأوا يسرعوا خطوتهم عشان يلحقوا التمرين في ميعاده .. ومرة واحدة شافوا راجل كبير في السن شايل شنط كثير وعايز يعدي الطريق الناحية الثانية ومش عارف .. قرر إياد يساعده .. جري بسرعة ناحية الراجل الكبير وعرض عليه المساعدة وشال إياد منه الشنط وفضل يشاور بأيده الثانية للعربيات عشان تهدي سرعتها لحد ما الراجل الكبير ده يعدي الطريق .. عرض عليه إياد أنه يوصله لحد بيته .. لكن الراجل الكبير قاله متشكر جدا يا ابني .. جزاك الله كل خير .. أنا خلاص جنب بيتي .. رد إياد وقال له ما تشكرنيش يا عمو أنا ماعملتش حاجة .. مشي إياد وهو سامع صوت الراجل الكبير عمال يدعي له "ربنا يوفقك يا ابني وينجحك وتطلع من الأوائل على مدرستك ويخليك لمامتك وباباك" فرح إياد جداً وابتسم ورجع لمحمد .. لاقاه غضبان جداً وقال له أنت أيه حكايته النهاردة يا إياد؟ أنت مصمم تأخرنا على ميعاد التدريب .. تعالى نرجع البيت بقي احنا كدة مش هانوصل في ميعادنا خلاص.

ضحك إياد وقال له أن ما عملتش حاجة غريبة يا محمد .. دي آداب الطريق اللي شرحتها لنا ميس نور الأسبوع اللي فات في الفصل .. أنت لحتت تنسى يا محمد .. أنكسف محمد من نفسه جدا .. وقال له أه صحيح افكرت .. عندك حق .. رد إياد وقال عموماً أحنا قربنا خلاص من النادي فاضل حته صغيرة تعالى نجري شوية وإن شاء الله ها نوصل في ميعادنا وبالفعل وصل محمد وإياد في ميعاد التدريب بالظبط.

حدوتة (٢٦) حسين وآداب بر الوالدين

الهدف منها توعية الأطفال بأداب بر الوالدين

كان يا ما كان .. كان فيه زمان .. ولد جميل ونشيط اسمه حسين .. وباباه وجدته بيحبوه جداً .. كان جده بيحب يجي يزورهم على طول ويقضي معاهم اليوم .. ويجيب له ألعاب وحاجات حلوة كتير .. وفي يوم من الأيام كان جد حسين عندهم ولا حظ أنه بيعمل شوية تصرفات غلط خالص .. مثلاً لقي حسين بيتكلم في البيت بصوت عالي على طول .. ومش بيسمع كلام مامته أو باباه .. وكل كلامه زعيق .. وكان ساعات كمان صوته بيعلى على باباه ومامته.

مرة ومامته بتكلم صاحبته في الموبايل .. قرب منها حسين وقالها بصوت عالي يووووة يا ماما أنا عمال أتكلم وأنده عليكى وأنتي مش سمعاني عشان بتتكلمي في الموبايل .. أنتي مش بتسيبي الموبايل ده من ايديك خالص يا ماما؟ .. استغرب جده من الطريقة اللي مش مؤدبة دي اللي حسين بيكلم بيها مامته .. ولما مامته مثلاً تطلب منه يساعدها في عمل أي حاجة في البيت بيرفض ويقول لها أنا مش فاضي يا ماما .. أنتي مش شيفاني بتفرج على التلفزيون؟ .. الكارتون اللي بحبه شغال .. مامته كانت بتضايق منه.

ومرة ثانية باباه كان راجع من الشغل وتعبان وقعد على الكرسي يستريح شوية .. حسين قعد يلعب ويتنطط ويتشقلب على الكرسي ومش مراعي أن باباه موجود .. كل ده وجد حسين متابع كل تصرفاته ومتضايق منه لأنه كان بيحبه جدا ونفسه يشوفه إنسان كويس ومؤدب وكل الناس تحبه .. قرر جده ان يتكلم معاه ويفهمه أنه بيتصرف غلط .. وبالفعل طلب جده منه أنه يقعدوا سوا مع بعض في أوضته.

ودخلوا الأوضة وقفلوا الباب عليهم وجده بدأ الكلام وقال بص يا حسين يا حبيبي .. أنا عايز أتكلم معاك في موضوع مهم .. قال له نعم يا جدو في أيه؟ قال له أنت عارف إني بحبك ونفسي أشوفك أحسن ولد في الدنيا كلها وأنا بصراحة شايف أنك بتعمل تصرفات غلط ما ينفعش يعملها ولد مؤدب زيك .. رد حسين وقال له .. ليه يا جدو أنا بعمل أيه يعني؟ .. قالوا بص يا حسين في آداب الدين بتاعنا خطاها لنا علشان نعرف إزاي نتعامل مع الأب والأم .. سأل حسين جده وقال له بجد يا جدو؟ اسمها إيه الآداب دي؟ .. رد جده وقال له اسمها آداب بر الوالدين .. لأن ربنا ها يحاسبنا يوم القيامة على معاملتنا ليهم واللي بيعامل أبوه وأمه في الدنيا كويس بيدخل الجنة.

أول الآداب دي يا حسين إننا نطيع الأب والأم .. يعني نسمع كلامهم .. لأن طاعة الوالدين من طاعة ربنا .. يعني ما ينفعش أقول لماما أو بابا أو ووف أو يووووة .. وكمان ما ينفعش أعلي صوتي عليهم أو أقاطعهم وهما بيتكلموا وأصبر لحد ما يخلصوا كلامهم وبعدين أتكلم .. ولما أتكلم معاهم أتكلم بصوت واطي وبأدب واحترام .. وقعد جده يفكره بالمواقف اللي شاف حسين وهو بيعملها مع مامته وباباه .. وكمان لازم تساعد مامتك لو طلبت منك أي مساعدة .. لأنها بتتعب جداً علشانك .. دة غير بقى أنك المفروض تقعد قدام باباك ومامتك بأدب واحترام مش أنتنطط وأتشقلب على الكرسي زي ما أنت بتعمل وخاصة وباباك كان راجع من الشغل تعبنا ومجهداً.

كان حسين بيسمع كلام جده وهو مكسوف .. معقول كان بيعمل كل الغلطات دي وهو مش واخذ باله .. يعني أكيد مامته وباباه كانوا بيضايقوا منه وبيزعلوا .. يعني ربنا كمان أكيد غضبان منه ومن معاملته الوحشة لباباه ومامته .. سأل جده طيب وبعدين يا جدو أعمل أيه دلوقتي عشان أصلح الغلطات اللي كنت بعملها دي .. قال له جده أنت لازم تعتذر لمامتك وباباك عن كل التصرفات الغلط اللي عملتها وتوعدهم أنك مش ها تكرر ها تاني .. وأنتك من دلوقتي ها تلتزم بأداب بر الوالدين .. رد حسين على جده وقال له حاضر يا جدو .. بس يا رب هما يسامحوني ويرضوا عني عشان ربنا يسامحني ويرضى عني.

حدوتة (٢٧) نهاية الديك المغرور

الهدف منها توعية الأطفال للبعد عن صفة الغرور

ولما وصلوا للمكان اللي عايزينه .. ركنوا العربية ونزلوا يتمشوا ويتفرجوا على المحلات .. بابا أنس دخل سوبر ماركت وجاب له شوية حاجات حلوة ياكلوها وهما بيتمشوا .. أكل منها أنس شوية حاجات .. وبعد ما خلص قام رمى الأكياس الفاضية في الأرض وهو ماشي .. مامته إتفاجئت بتصرفه ده .. وقالت له يا أنس أيه اللي انت عملته ده؟ أنا وانت متفقين أننا نحافظ على نظافة أي مكان نقعد فيه .. سواء قاعدين في بيتنا أو النادي أو ماشيين في الشارع أو لو حتي قاعدين على شاطئ البحر.

أنس قال لها أيوه يا ماما حضرتك قولتي لي كدة بس .. ده لو كان المكان اللي أنا فيه أصلا نظيف لكن الشارع زي ما أنتي شايبة يا ماما .. مليون زبالة وأكياس وعلب فاضية .. يبقى أحافظ على نظافة أيه بقي لما المكان أصلا أهو مش نظيف؟ .. مامته قالت له لا يا حبيبي أنت فهمتني غلط .. أنت لازم تحافظ على نظافة أي مكان بتقعد فيه بآنك ما ترميش أي فضلات أكل أو أكياس أو أوراق أو علب فاضية في المكان .. حتي لو المكان مش نظيف .. لأن اللي وسخ الشارع كدة ناس زيك بردو .. فكروا نفس تفكيرك .. وقالوا يعني الكيس الفاضي بتاعي هو اللي ها يوسخ الشارع وراماه علي الأرض .. وغيره قال يعني الورقة اللي في أيدي دي لو رمتها في الأرض هي اللي ها توسخ الشارع وقام رامي هو كمان .. وغيره وغيره لحد ما الشارع وصل للحال ده.

ودول طبعا يا حبيبي ناس مامتهم ما علمتهمش أن النظافة من الإيمان .. لأن ناس كثير بتفكر النظافة يعني أن شكلي يبقى نظيف وبيتي يبقى نظيف وبس ومالهومش دعوة بأي مكان تاني .. ما يعرفوش أن النظافة سلوك عام .. النظافة يعني أحافظ علي نظافة الشارع اللي بمشي فيه .. والحديقة اللي بتفسح فيها أو النادي أو المدرسة .. حتي شاطئ البحر لما بنروح المصيف .. لأن أحنأ بنروح الأماكن دي عشان نتبسط ونغير جو ونشوف مناظر جميلة .. مش عشان نشوف الزبالة.

كملت مامته كلامها وقالت لو كل واحد فينا أكل أو شرب حاجة يحطها في كيس ويدور على أقرب باسكت ويرميها فيه .. ها يلاقي نفسه قاعد في مكان نظيف وغيره هيجي يلاقي المكان نظيف وهكذا .. رد أنس وقال لها عندك حق يا ماما .. فاكدة الحديقة اللي روحنها آخر مرة .. ولاقيناها مليانة ورق وأكياس فاضية وزبالة في كل مكان .. وقرفنا منها ومشينا لأننا طول ما أحنأ بنتمشي فيها كنا بندوس برجلينا على الزبالة .. قالت له مامته طبعا فكرها .. سألت أنس مامته وقالها طيب يا ماما .. مش المفروض كل مكان يبقى فيه عمال نظافة مهمتهم تنظيف المكان؟ قالت له فعلا بيبقى فيه عمال نظافة .. بس مش معني كدة أننا نوسخ المكان ونقول هما ينضفوا ورانا بقي .. قال لها طيب يا ماما مش هي دي شغلته؟ مش هو الزبال؟ .. قالت له لا يا حبيبي مش اسمه زبال .. الزبال هو اللي بيرمي الزبالة ويوسخ المكان .. لكن هو اسمه عامل نظافة لأن هو اللي بينظف الأماكن اللي الناس بتوسخها.

ولو تلاحظ يا أنس أن بيبقي أغلب عمال النظافة ناس كبار في السن وبيشتغلوا الشغلانة دي عشان عايزين يكسبوا فلوس حلال .. فا تخيل بقي يا أنس كل ورقة أنت بترميها على الأرض .. بتتسبب في أن العامل ده يوطي ويلمها وراك وأحنأ لازم نرحمهم بردو .. دة الراحمون يرحمهم الله .. اشتري أنس لبس العيد وروح البيت وهو فرحان .. مش بس باللبس الجديد لا وكمان بالدرس الجديد اللي اتعلمه النهاردة من مامته وقرر أنه يعلمه لكل أصحابه في النادي وفي المدرسة.

حدوتة (٢٩) لعبة أحمد

الهدف منها توعية الأطفال بمفهوم السرقة

كان يا ما كان .. كان فيه زمان .. ولد اسمه أحمد .. أحمد كان عنده ولد صاحبه في المدرسة بيحبه أوي اسمه عاصم .. وفي يوم من الأيام بابا أحمد جاب له عريية لعبة جديدة .. استأذن أحمد باباه انه ياخذها معاه المدرسة علشان يوربها لصاحبه عاصم .. اللعبة عجبت عاصم جدا .. وأتمني أن تكون اللعبة دي بتاعته هو لدرجة أن الشيطان خلاه يفكر في فكرة وحشة أوي .. أستنى عاصم لما أحمد قام يكلم المدرس ويسأله على حاجة .. وفتح شنطة أحمد وأخذ اللعبة .. وبسرعة خباها في شنطته من غير ما حد يشوفه أو ياخذ باله.

ولما رجع عاصم البيت خبى اللعبة في أوضته .. وفضل يلعب بيها وهو مبسوط جداً .. لحد ما نام من كثر التعب علي السرير وفي أيده اللعبة بتاعة أحمد .. ولما دخل باباه علشان يطمئن عليه .. لاقه نايم .. ولما قرب من سريره .. شاف اللعبة واستغرب جدا .. مين جاب له اللعبة الجديدة دي .. وأخذ اللعبة وخبأها .. وتاني يوم صحي عاصم من نومه وافتكر اللعبة .. فضل يدور عليها ما لقهاش .. ومابقاش عارف يعمل أيه؟ .. مافيش قدامه غير أنه يسأل باباه ومامته.

وساعتها سأله باباه أنت جيت للعبة دي مينين يا عاصم؟ .. أتكسف عاصم وبقي مش عارف يرد .. باباه قال له قول الحقيقة وأحكي لي أية اللي حصل بالطبط .. حكى عاصم لباباه عن كل اللي حصل مع أحمد في الفصل .. استغرب باباه وقال له .. معقول يا عاصم ازاي تاخذ حاجة مش بتاعتك من ورا صاحبها؟ .. أنت كدة سرقتها ودي تبقي سرقة طبعاً... وأنت عارف أن اللي ببسرق ربنا هيعاقبه عقاب شديد وها يدخل النار .. عاصم قعد يعيط وقال لباباه .. أنا ما كنتش أقصد يا بابا .. أنا كنت ها ألعب بيها وها رجعتها له بكرة .. باباه قال له بيبقى كان لازم تستأذن صاحب اللعبة قبل ما تأخذها .. لأن الإنسان الأمين ما يعملش كدة أبداً .. ورسولنا سيدنا محمد عليه الصلاة والسلام كان أمين جداً .. وعلشان كدة كل الناس كانت بتحبه .. ولو أنت مكان أحمد وحد سرق لعبتك الجديدة .. أكيد كنت ها تزعل جداً.

رد عاصم عندك حق يا بابا .. أنا أسف جدا والله.. باباه رد وقال فكر بقي دلوقتي معايا ها تصلح اللي عملته ده ازاي؟ .. رد عاصم وقال ها أرجع اللعبة لأحمد بكرة وها أعترف له بكل حاجة .. وبالفعل راح عاصم المدرسة لقي أحمد صاحبه قاعد زعلان .. وأول ما شاف عاصم قال له وهو بيعيط .. شوفت يا عاصم لعبتي الجديدة ضاعت مني .. طلع عاصم اللعبة من شنطته وأداها لأحمد واعترف بغلطته وطلب منه أنه يسامحه.

حدوتة (٣٠) شعر دارين

الهدف منها توعية الأطفال بالرضا وشكر الله على جميع النعم

كان يا ما كان .. كان فيه زمان .. بنوتة جميلة اسمها دارين .. كانت دارين دايمًا زعلانة وحزينة .. لأن شعرها ناشف وخشن ومش ناعم وجميل زي بقية أصحابها في المدرسة .. وكمان أصحابها كانوا بيضايقوها ويفضلوا يتريقوا عليها وعلى شعرها .. وخصوصًا نور زميلتها اللي كانت دايمًا تقول لها أنا شعري ناعم وجميل لكن أنتي شعرك وحش أوي أنتي بتسرحيه ازاي دة وتقعده تضحك عليها.

رجعت دارين من المدرسة في يوم وهي حزينة جداً وبتعيط وقالت لمامتها .. أنا مش عايزة أروح المدرسة تاني .. أتخضت مامتها من كلامها وسألته عن السبب .. ردت دارين وهي بتعيط .. هو أنا ليه يا ماما شعري ناشف وخشن وعلى طول هایش .. ليه دايمًا أنتي اللي بتسرحي لي شعري وأنا مش بعرف أسرح لنفسي .. أشمعي أصحابي كلهم في المدرسة شعرهم ناعم وجميل وأنا لا .. ولما مامتها فهمت أن أصحابها في المدرسة بيضايقوها وبيتريقوا على شعرها.

طلبت مامتها منها أنها تهدي وتبطل عياط .. وقالت لها بصي يا دارين .. ربنا هو اللي خلقنا مش أحنا اللي بنخلق نفسنا .. وربنا كمان رزقنا بنعم كثير لازم نحمده ونشكره عليها .. ولازم كمان تكوني واثقة في نفسك وفي شكلك أنك جميلة حتى بشعرك الناشف الهايش .. وما تقارنيش نفسك بأصحابك وتقولي أشمعي هما .. وعلى فكرة أنا ممكن أجيب لك مشط أسنانه واسعة تعرفي تسرحي بيه لنفسك .. وممكن نفكر مع بعض ونعمل كل يوم تسريحات مختلفة في شعرك وأنتي رايحة المدرسة الصبح .. وها أجيب لك كمان تيواك كثير جديدة وملونة وجميلة .. أيه رأيك؟ .. وافقت دارين على كلام مامتها .. لكنها بردو كانت لسه زعلانة.

و في يوم من الأيام .. باباها طلب منهم أنهم يجوا معاه يزورا بنت زميله في الشغل .. لأنها مريضة وعندها مرض وحش أوي اسمه السرطان .. ولما راحت دارين مع باباها ومامتها وشافت بنت صاحب باباها استغربت جدا لأن ما عندهاش شعر .. واستغربت أكثر لما لاقت البنت عمالة تضحك وتهزر معاهم عادي ومش زعلانة.

سألت مامتها بصوت واطي جداً .. مامتها فهمتها أن علاج مرض السرطان ممكن يوقع الشعر .. زعلت دارين جدا علشان البنيت وفضلت تدعي لها أن ربنا يشفيها ويرجع شعرها يطلع ثاني وتبقى جميلة .. ولما روحت دارين بيتها ودخلت اوضتها بصت لنفسها في المرآة وقالت لنفسها .. أنا كنت غطانة لما زعلت أن شعري ناشف وخشن وهائش .. أنا من النهاردة ها أقول دايم الحمد لله على كل النعم اللي ربنا بيديها لنا .. وكمان ها أعمل زي ما مامتي قالت لي وإن شاء الله ها يبقى شكلي جميل ومش ها أهتم بكلام نور أو أصحابي اللي بيضايقوني .. أنا جميلة بشعري وبشكلي كدة.

حدوتة (٣١) القرد شرشر

الهدف منها حث الأطفال على ضرورة النظافة الشخصية

كان يا ما كان .. كان فيه زمان قرد اسمه شرشر .. شرشر كان عايش في الغابة مع أصحابه القرود .. لكنه مختلف عن باقي أصحابه لأن شكله قبيح .. شرشر ما كانش بيهتم بنظافة جسمه زي باقي أصحابه .. ومش بيحب يستحمي أو يسرح فروه .. وغير كدة كمان كان مغرور جدا وشايف نفسه أحلى قرد في الغابة .. وكان يقعد يتنطط بين الشجر ويغني على الرغم من أن صوته كان مش حلو .. ويقول أنا شكلي جميل .. أنا فروي جميل .. وكأنه مش حاسس بنفسه وبشكله .. حتى جسمه بقي ضعيف من كثر الأمراض اللي بقت بتجي له .. وأصحابه بعدوا عنه وما بقوش يرضوا يلعبوا معاه.

كان القرد شرشر بيقف يتفرج على أصحابه وهما يلعبوا مع بعض ويتنططوا على الشجر .. وهو مش قادر يطلب منهم أنه يلعب معاهم لأنه عارف أنهم ها يرفضوا .. في يوم من الأيام .. كانت القرود في الغابة عاملين مسابقة بينهم .. علشان يشوفوا مين اللي ها يقدر يتسلق أعلى شجرة في الغابة ويوصل لأخرها .. واللي ها يكسب له جائزة عبارة عن تاج مكتوب عليه أقوى قرد في الغابة .. كان شرشر بيتفرج عليهم وهما بيستعدوا ويتربوا للمسابقة .. وكان نفسه يشارك معاهم .. شافه قرد من أصحابه وصعب عليه جداً .. وكان قرد ذكي .. وجت له فكرة حلوة أوي.

راح للقرد شرشر وقال له أيه رايبك تحب تشارك معنا في المسابقة؟ .. فرح شرشر ورد بلهفة يا ريت بس أنتم مش ها ترفضوا .. قال له القرد الذكي أنا ممكن أخليهم يوافقوا .. بس أنت واثق طيب إنك ممكن تفوز في المسابقة وتتسلق أعلى شجرة في الغابة .. رد القرد شرشر بثقة وقال .. أه طبعاً أقدر .. وكان القرد الذكي عارف أن جسم شرشر بقي ضعيف بسبب عدم محافظته على نظافته ومرضه دايماً .. ومتأكد أنه مش ها يكسب .. فسأله طيب يعني ها تقدر تتحدى كل القرود اللي في الغابة؟ .. رد شرشر في تحدي .. طبعاً أقدر .. قال القرد الذكي .. طيب ولو خسرت ها يبقى لك عقاب ها يحكم عليك بيه قرود الغابة كلهم وساعتها لازم تنفذه .. رد القرد شرشر وقال .. ماشي موافق.

جه يوم المسابقة .. وفضل القرد يتسابقوا ويحاولوا يوصلوا لقمة أعلى شجرة في الغابة .. واشترك شرشر في المسابقة معاهم .. وفضل يحاول ويحاول لكنه يا دوب وصل لنص الشجرة وتعب وما قدرش يكمل .. قرد واحد بس هو اللي وصل وكسب وأخذ الجائزة اللي كانت عبارة عن تاج مكتوب عليه أقوى قرد في الغابة .. أما شرشر فكل القرد قعدوا يفكروا له في عقاب وكان الحكم بتاعهم أن شرشر يستحمي في بحيرة الغابة.

اتضايق شرشر من العقاب ده .. لأن دي أكثر حاجة هو بيكرها .. فرفض وقال لهم .. لا لا اختاروا لي أي عقاب ثاني .. لكن القرد أصروا على حكمهم .. وشالوا القرد شرشر وراحوا للبحيرة ونزلوه فيها وغصبوا عليه انه ينظف جسمه كويس كمان .. ولما خرج سرحوا له شعره .. وكل القرد استغربت جدا من شكله .. شكله اتغير خالص .. بقي أمور جدا .. وريحته بقت جميلة .. ويقوا مبسوطين منه جدا وطلبوا منه يرجع يلعب معاهم ثاني .. شرشر كمان بقي فرحان أوي بنفسه .. وحس أنه فعلاً شكله أتغير وبقي أحلى لما نظف جسمه .. ووعد أصحابه أنه ها يحافظ دايماً على نظافته .. وشكر القرد الذكي لأنه السبب في كل اللي حصل.

حدوتة (٣٢) نادر الشجاع

الهدف منها حث الأطفال للابتعاد عن الكذب

كان يا ما كان .. كان فيه زمان ولد اسمه نادر .. مشكلة نادر الوحيدة أنه كان بيعمل حاجة وحشة أوي .. نادر كان بيحب يخدع أصحابه ويفهمهم أنه شجاع وقوي .. لأنه كان بيحب أن كل الناس تتكلم عنه وعن شجاعته ومغامراته اللي ما بتخلصش .. وكل ما يتجمع مع حد من أصحابه أو جيرانه اللي في سنه يفضل يألف ويحكي لهم حكايات من خياله عن مغامراته مع الراجل اللي كان عايز يخطفه وأزاي نادر بذكائه هرب منه .. وفي مرة تانية حكى لهم عن مغامرته مع الكلب اللي هجم على أخته الصغيرة وهي ماشية جنبه .. وكان ها يعضها .. بس نادر الشجاع القوي دافع عنها وهزم الكلب وأنقذ أخته الصغيرة .. وكان أصحابه بيحبوه وبيصدقوه لما بيحكي لهم أي حاجة .. ما كنوش يتوقعوا أنه بيكذب عليهم .. وبقوا دايمًا بيتكلموا عن نادر بأنه ولد شجاع وقوي.

وفي يوم من الأيام اتجمع حواليه أصحابه في المدرسة وفضل يحكي لهم عن مغامرته الجديدة مع الحرامي اللي دخل بيتهم .. وباباه ومامته نايمين .. وكان هيسرقهم .. بس نادر بقى الشجاع قدر يضرب الحرامي لوحده وحبسه في الأوضة وأتصل بالبوليس علشان يجيوا يقبضوا عليه .. أصحابه صدقوه كالعادة .. وقالوا له برافو عليك يا نادر أنت بطل .. وأحنا فرحانين أنك صاحبنا.

وفي مرة اتفق نادر مع أصحابه أنهم يلعبوا ماتش كورة في الحديقة اللي قدام العمارة بتاعتهم .. وهو بيلعب مع أصحابه .. ظهر لهم كلب ضخمة وكبير فجأة .. وفضل يهوهو ويقرب منهم .. كل الأولاد خافوا وأترعبوا وندھوا بسرعة على نادر .. يا نادر يا نادر ألقنا .. أنقذنا من الكلب ده بسرعة .. أنت أشجع وأقوى واحد فينا .. بص لهم نادر وهو خايف ومرعوب أصلاً ومش عارف يتصرف أزاي ولا يقول أية .. ولما قرب منهم الكلب الضخم أول واحد جري كان نادر .. جري بسرعة ناحية العمارة .. والكلب بدأ يجري وراه .. نادر فضل يجري والكلب يجري وراه .. لحد ما وصل للعمارة .. ودخل نادر العمارة وقفل بسرعة الباب وراه .. وقف الكلب برة الباب وقعد يهوهو بصوت عالي حبة وبعدين سكت ومشى لبعيد عن العمارة.

أصحاب نادر بقوا واقفين مستغربين .. معقول ده نادر الشجاع القوي .. اللي دايمًا بيحكي لنا عن مغامراته وشجاعته .. وكنا فاكيرين أن هو اللي ها يدافع عنا وينقذنا من الكلب .. ولما فهموا وأتأكدوا انه كان بيكذب عليهم .. وأن كل المواقف اللي كان بيحكليهم عليها محصلتش .. فضلوا يضحكوا ويتريقوا عليه .. لأنهم كانوا بيصدقوه طول الفترة دي.

وبعدھا بشوية رجع لهم نادر تاني .. ولما لاقهم عمالين يتريقوا عليه أنه سابهم وكان أول واحد يجري .. وبقى نادر مكسوف ومش عارف يرد عليهم يقول أیه .. وبعدين ضحك وقال لهم لا ده أنا كدة أنقذتكم .. ما أنا جريت علشان الكلب يجري ورايا أنا ويسيبكم.

حدوتة (٣٣) يوم سعيد مع تيته

الهدف منها توعية الأطفال بيوم اليتيم والعطاء ومساعدة الغير

كان يا ما كان .. كان فيه ولد اسمه علي .. كان علي عنده أخت اسمها علا .. على وعلا كانوا بيحبوا جدتهم أوي وبيروحوا يزوروها كل يوم جمعة وبيتجمعوا هما وأولاد خالتهم كريم وعمر .. وفي مرة من المرات وهما عند جدتهم متجمعين حواليتها وبيتكلموا معاها .. جدتهم قالت لهم أعملوا حسابكوا يا حبايبي أن يوم الجمعة الجاية ها نخرج مع بعض مش ها نقعد في البيت .. فرح الأولاد أوي وقالوا لها ياريت يا تيته .. بس هانروح فين يا ترى؟ ردت تيته وقالت لهم أنا السنة اللي فاتت روحت المكان ده لوحدي بس السنة دي استأذنت مامتك وباباكم أني أخدمك معايا .. سألتها علا هو أحنا هانروح فين بقى يا تيته .. ردت جدتها ها نروح دار أيتام.

استغرب الأولاد كلهم وقالوا لها يعني أيه يا تيته دار أيتام دي؟ .. دي حديقة جديدة ولا أيه؟ ضحكت جدتهم وقالت لهم لا يا حبايبي .. بصوا يا أولاد .. كل واحد فينا بيبقى عنده أب وأم بيعيش معاهم وبيربوه ويخلوا بالهم منه لحد ما يكبر ويعتمد على نفسه .. ودي نعمة من ربنا علينا .. والطفل اللي ما بيبقاش عنده أب وأم بيبقى اسمه يتيم .. ودار الأيتام دي أتعملت عشان يجمعوا فيها الأطفال دول ويخلوا بالهم منهم ويربوهم ويعلموهم لحد ما يكبروا ويشغلوا ويتجوزوا .. سألتها علا طيب وأحنا ها نزوح هناك نعمل أيه يا تيته .. ردت جدتها وقالت لها .. بصي يا علا الأطفال دول بيبقوا محرومين من حاجات كتير .. وأحنا المفروض نزوح ونزورهم .. وناخد لهم معانا هدايا كمان عشان نفرحهم بيها.

بصت علا لجدتها وقالت لها .. هدايا زي أيه كدة يا تيته؟ قالت جدتها ممكن ناخد لهم لبس جديد أو ألعاب جديدة .. أو أحذية جديدة .. والأهم من كدة أننا نعاملهم بحنية ونعطف عليهم ونحسسهم أننا بنحبهم وبنسأل عليهم ونزورهم .. وما نحسسهمش أنهم أقل مننا في حاجة .. لأنهم أطفال زيكم بالظبط .. لكن الفرق أن ربنا حرمهم من نعمة الأب والأم من وهما صغيرين .. وكفاية أنهم اتحرموا من مامتهم وباباهم .. يعني مش بيلاقوا حد يدلهم أو ياخدهم في حضنه ويجيب لهم الحاجات اللي نفسهم فيها زي ما باباكو وماماتكو بيعملوا معاكوا .. مش كدة ولا أيه؟ .. رد الأولاد وقالوا لها عندك حق يا تيته.

سألها علي وأشمعني الجمعة الجاية يا تيته؟ .. ما تيجي نروح النهاردة .. قالت له لأن الجمعة الجاية أول جمعة من شهر أبريل .. واليوم دة بيبقى اسمه يوم اليتيم .. أحنا طبعاً ممكن نزورهم في أي يوم .. لكن اليوم دة بيبقى مخصص للاحتفال بالأطفال الأيتام في كل مكان .. عشان يفكروا الناس بالأطفال الأيتام ويشجعوهم يقفوا جنب الأيتام في اليوم ده .. واللي يقدر يساعد بحاجة يعملها طبعاً.

سكت الأولاد حبه وبعدين قال عمر لجدته .. طيب أيه رايبك يا تيته لو كل واحد فينا استأذن باباه ومامته وأخذنا جزء من الفلوس اللي في حصالتنا وجبناه لحضرتك يوم الجمعة الجاية معانا .. وبنشتري هدايا للأطفال الأيتام لما نزوح لهم .. ابتسمت جدته وقالت له .. برافوا عليك يا عمر .. دي فكرة جميلة جداً .. أنا موافقة .. وهاخدكوا معايا كمان تختاروا الهدايا بنفسكم .. فرح الولاد أوي.

ولما جه يوم الجمعة وراح الأولاد عند جدتهم ومعاهم الفلوس اللي محوشينها من مصروفهم .. وكمان باباهم ومامتهم ساعدوهم وأدولهم فلوس تانية عشان يجيبوا هدايا أكثر للأيتام .. وأخذتهم جدتهم وراحوا اشتروا هدايا كتير .. علا قالت أنا عايزة اشتري فساتين للبنات واللعبة عروسة .. وكريم قال وأنا ها أختار لبس للأولاد واللعبة عربية أو طائرة .. كان علي وعلا وكريم وعمر طابرين من الفرحة وهما بيختاروا بنفسهم الهدايا اللي هيدوها للأطفال الأيتام .. وأول ما وصلوا دار الأيتام .. ودخلوا وشافوا الأطفال .. كان شكلهم حزين جداً .. جدتهم قالت لهم يلا خدوا الهدايا ووزعوها على الأولاد والبنات.

كان الأولاد مبسوطين جداً لما حسوا أنهم بيعملوا حاجة حلوة بجد .. لأنهم ها يفرحوا طفل يتيم بلبس جديد أو لعبة جديدة .. وفرحتهم كانت أكبر لما شافوا الضحكة على وش الأطفال الأيتام .. وأد أيه فرحوا بالهدايا اللي هما اختاروها لهم .. والأطفال لبسوا اللبس الجديد .. وبدأت الحفلة بقى في الدار وشغلوا الأغاني وبدأ عرض العرايس والمسكات وقعدوا يلعبوا معاهم طول اليوم.

حدوتة (٣٤) أحلى أصحاب

الهدف منها توعية الأطفال بتجنب نشر الأكاذيب بين الناس

كان يا ما كان .. كان فيه زمان .. بنتين أصحاب جدا .. اسمهم حبيبة ولارا .. وكانوا بيحبوا بعض أوي كأنهم اخوات بالظبط .. ومع بعض دايماً في المدرسة .. وبيحبوا يقعدوا جنب بعض في الفصل .. وبيشجعوا بعض على المذاكرة .. ويساعدوا بعض في كل حاجة .. حتى المدرسين بتوعهم كانوا واخدين بالهم من حبيبة ولارا .. وكانوا فرحانين بيهم جدا لأنهم شاطرين جدا .. وفي يوم من الأيام .. جت لارا المدرسة وأول ما طلعت الفصل

بتاعها بصت لحبيبة بصة وحشة وما قعدتش جنبها .. وراحت قعدت واحدة تانية من أصحابهم .. وحبيبة كمان راحت مدورة وشها الناحية التانية وندهت لدارين صاحبتهم تيجي تقعد جنبها بدل لارا.

لما المدرسة بتاعتهم دخلت الفصل .. وشافت لارا مش قاعدة جنب حبيبة .. سألتهم عن السبب .. ردوا الاتنين في صوت واحد .. مفيش حاجة يا ميس .. أتكرر الموضوع دة لمدة أسبوع .. حبيبة ولارا متخاصمين ومبيكلموش بعض ومبيلعبوش سوا زي الأول .. حست المدرسة بتاعتهم أن في حاجة مش مطبوعة .. وقررت تتدخل وتتكلم معاهم بعد الحصة وتفهم منهم أية اللي حصل .. وبالفعل ندهت المدرسة على حبيبة ولارا وأخذتهم برة الفصل .. وسألتهم مالكم يا بنات أنتم مخاصمين بعض ولا أية؟ .. ردت لارا .. أيوة يا ميس أنا زعلانة منها ومش عايزة أكلها تاني خالص .. مش عايزاها تبقى صاحبتني .. وردت حبيبة هي كمان وقالت وأنا كمان مش عايزاكي تبقى صاحبتني .. استغربت المدرسة جدا من كلام الأتنين .. وقالت لهم هو حصل أيه بس بينكم عشان تقولوا كدة؟.

ردت لارا وقالت هي يا ميس اللي بدأت وراحت قالت لدارين صاحبتنا كلام وحش أوي عليا .. دي قالت لها أنني مش شاطرة وبغش منها في الامتحانات عشان كدة بجيب الدرجات النهائية .. بس أنا والله بذاكر كويس جدا وحضرتك عارفة إنني بحل لوحدي في الامتحانات من غير ما حد يساعدي .. اندهشت حبيبة وقالت لها .. لا ما حصلش .. دارين قالت لي أنك أنتي اللي قولتي عليا الكلام دة .. ساعتها بس الميس فهمت الحكاية وراحت ندهت لدارين من الفصل .. علشان تواجهها وتسألها أدام البنات .. دارين بقت مكسوفة من نفسها ومش عارفة ترد تقول أيه وكانت خايفة جدا ومرعوبة .. طلبت منها المدرسة أنها تفهم حبيبة و لارا هي قالت أيه كدة .. حسيت دارين ان مفيش مفر وأنها لازم تعترف.

بدأت دارين تحكي للمدرسة وقالت لها .. أنها كانت متغاضبة وبتغير جدا منهم علشان لارا وحبيبة قريبين من بعض وبيحبوا بعض .. وكان نفسها يلعبوا معاها ويصاحبوها هي كمان .. ففكرت تعمل كدة علشان تخلي حبيبة تخاصم لارا ويبعدوا عن بعض .. لارا وحبيبة ما كنوش مصدقين كلام دارين .. ولما سألت لارا حبيبة وقالت لها يعني أنتي ما قولتيش عليا الكلام دة فعلا يا حبيبة؟ .. قالت لها لا والله أنا عارفة أنك شاطرة وبتذاكري كويس وكل واحدة فينا بتحل لوحدها في الامتحان.

المدرسة زعلت جدا من دارين وطلبت منها أنها تعذر لحبيبة ولارا وتوعدهم أن الموقف دة ما يتكررش تاني .. وقالت لحبيبة و لارا .. على فكرة أنا زعلانة منكم جدا بردو أنتوا الاتنين .. استغربوا البنتين وسألوها .. ليه بس يا ميس .. قالت لهم لأنكم غلطتوا غلطتين .. الغلطة الأولى هي أن كل واحدة فيكم لما دارين قالت لها الكلام دة عن صاحبتهم صدقتوا الكلام اللي ألفتوا من دماغها وزعلتوا من بعض .. من غير ما كل واحدة ترجع للتانية وتسألها وتتأكد منها اذا كان فعلا الكلام دة حصل ولا لا .. والغلطة التانية هي أنكم خاصمتوا بعض لمدة أسبوع .. رغم أن ديننا الإسلامي قال لنا ما ينفعش المسلم يخاصم أخوه المسلم أكثر من ثلاثه أيام.

حطت حبيبة ولارا وشهم في الأرض وكانوا مكسوفين من نفسهم .. واعتذروا للمدرسة .. ووعدوها أن الموقف دة مش ها يتكرر تاني أبدا .. وأن لما حد يقول لهم على حاجة تاني لازم يتأكدوا منها بنفسهم.

حدوتة (٣٥) التاجر الحكيم

الهدف منها توعية الأطفال بفضل الصدقة وجلب البركة في الرزق.

كان يا ما كان .. كان فيه زمان .. تاجر حكيم وذكي عنده محل بيع فيه أرز وفول وعدس وحاجات تانية كثير .. وكان عنده ولدين شباب يبساعدوه .. وجنب المحل بتاع التاجر كان فيه بيت قديم وصغير عايش فيه رجل فقير متجوز وعنده ولد وبنت صغيرين .. وكان التاجر عايز يساعدهم بس مش عارف إزاي .. وفي يوم من الأيام جت له فكرة حلوة أوي .. راح للراجل الفقير في بيته وسأله أنت تعرف تشتغل أيه؟ .. فرد الراجل وقال له أنا

زمان كنت شغال صياد سمك على مركب .. بس صاحب المركب اتخانق معايا وما رضيش اشتغل معاه تاني .. فرد التاجر الحكيم وقال له خلاص أعمل حسابك بكرة ها تيجي معايا .. وها شتري لك مركب تشتغل عليه.

فرح الرجل الفقير جدا .. وقال له بجد هاتشتري لى مركب .. أنا موافق .. وأول ما اشتغل وأكسب فلوس ها أرجع لك تمن المركب .. قال التاجر .. لا أنا مش عايز حاجة .. أي فلوس ها تكسبها من السمك اللي هتصطاده وتبيعه دي ليك أنت وأولادك .. يوم بعد يوم .. بدأ الراجل الفقير يشتغل ويكسب فلوس والخير عنده يزيد وبقي معاه فلوس كثير .. وكمان التاجر ربنا كرمه بفلوس كثير وبقي يبيع ويكسب وفتح محلين تانيين .. وأدى لكل ولد من أولاده محل يشتغل فيه.

وفي يوم من الأيام .. تعب التاجر الحكيم تعب شديد .. واستمر تعب فترة وفشل كل الأطباء في علاجه لحد ما أتوفى .. كان أولاده زعلانين جدا على باباهم .. وبعد فترة قرروا أنهم يشوفوا كل الحاجات اللي كانت ملك باباهم ويقسموها بينهم هما الاتنين .. واحد منهم قال للتاني .. بص بقي بابا الله يرحمه كان عنده ثلاث محلات .. أنا ها أخذ واحد وأنت واحد والثالث نبيعه ونقسم تمنه بالنص .. رد أخوه وقال له .. أنت نسيت حاجة مهمة .. بابا كان عنده مركب الصيد اللي بيشتغل عليها جارنا الصياد.

راحوا لجارهم وقال له عايزين المركب بتاعة بابا .. الصياد قال لهم بس دي باباكم أهالي وقالى دي بتاعتك واشتغل عليها ورفض أنني أدفع له تمنها .. قال له ملناش دعوة بقي .. أحنا بابانا أتوفى وعايزين المركب بتاعتنا .. غضب الصياد جدا منهم .. وما كتنش قدامه غير أنه يدي لهم المركب .. وأخذوا المركب وباعوه وقسموا تمنه بينهم بالنص .. ويوم بعد يوم .. لاحظ أولاد التاجر أن المحلات بتاعتهم محدش بيشتري منها .. وما بقوش بيكسبوا أي فلوس خالص .. لكن الصياد قدر بالفلوس اللي محوشها يشتري مركب صيد جديدة .. ويشتغل عليها ويكسب فلوس كثير.

لكن أولاد التاجر الحكيم ما بقوش بيكسبوا خالص .. وصرقوا كل الفلوس اللي معاهم .. واضطروا يبيعوا المحلات بتاعتهم كمان .. استغرب اولاد التاجر الحكيم على حالهم واللي حصلهم .. واحد منهم قال للتاني .. هو أيه اللي بيحصلنا ده؟ لما بابانا كان عايش .. كان ربنا بيرزقنا دايمًا .. وبنكسب فلوس كثير .. وبدل للمحل الواحد بقي عندنا ثلاثة .. رد عليه أخوه وقال له .. أنا دلوقتي بس فهمت .. ربنا كان بيرزق بابانا لأنه ساعد الصياد وجاب له مركب يشتغل عليها .. لكن لما أخذنا منه المركب كان ده مصيرنا اللي نستحقه.

حدوتة (٣٦) الأصدقاء

الهدف منها توعية الأطفال البعد عن صفة الانانية وحب الذات

كان يا ما كان .. كان فيه ٤ حيوانات أصدقاء وبيحبوا بعض جداً.. قرد وفيل وزرافة ودب .. في فصل الصيف كل يوم كانوا بيتجمعوا مع بعض يأكلوا ويشربوا ويلعبوا لحد ميعاد النوم ما يجي .. ولما قرب فصل الشتاء .. قعدوا يفكروا هيعملوا أيه عشان يحموا أنفسهم من البرد والمطر .. فكروا أنهم يساعدوا بعض وبنينوا لكل واحد فيهم بيت قوي .. يحميه من المطر والبرد.

قالت الزرافة أنا والفيل ممكن نجمع أكبر عدد من فروع الشجر .. والدب قال وأنا أقدر أشيلهم وأوصلهم للمكان اللي هنبني فيه البيوت .. وقال القرد أنا بقي هجيب لكم الحبال وعشان أنا حتمي صغير وبقدر انتنطط بسهولة هقدر أربط فروع الشجر في بعض بالحبل وبكدة هانقدر نبني بيوت قوية لينا .. وفعلاً بدأوا في تجميع فروع الشجر وأول يوم عملوا بيت الزرافة .. تاني يوم عملوا بيت الفيل .. ثالث يوم عملوا بيت الدب .. وجه الدور على بيت القرد رابع يوم.

لكن الفيل والدب والزرافة كانوا تعبوا ومش قادرين .. قعدوا يتهربوا من القرد .. كل يوم يروح يقول لهم .. يلا بقى فاضل البيت بتاعي .. يقولوا له إحنا تعبناين .. طيب نرتاح شوية النهاردة .. ونبنيه بكرة .. لحد ما فصل

الشتا بدأ .. والجو بقي بارد ومطر والقرود مش لاقى مكان يحميه .. وفي يوم كان فيه مطر شديد .. فكر القرود يعمل أيه .. قال أنا هروح استخبى في بيت أي حد من أصدقائي الفيل أو الدب أو الزرافة.

خبط على بيت الزرافة وطلب منها تفتح له عشان يستخبى عندها من المطر الشديد .. الزرافة قالت له مش هينفع تقعد معايا يا قرود هنبقي مزنوقين.. أنا البيت على قدي .. خبط على بيت الفيل وطلب منه نفس الطلب .. الفيل قال له مش هينفع يا قرود .. أنا ضخم وحجمي كبير أخاف أدوس عليك برجلي وأنا مش شايفك .. خبط على بيت الدب وطلب منه نفس الطلب .. الدب قال له مش هينفع يا قرود .. أنا اتجوزت .. وعاش مع الدبة مراتي في البيت مفيش مكان ينفع تقعد فيه معنا.

زعل القرود جدا من أصدقائه وفضل طول الليل قاعد في البرد والمطر الشديد .. وهو بيترعش مش عارف يروح فين .. لما طلع الصبح وخرجت الحيوانات من بيوتها .. لقوا القرود نايم على الأرض تعبان وبترعش وجسمه سخن جدا .. صعب عليهم جدا وحسوا بالذنب إنهم كانوا أنانيين ومفكروش غير في نفسهم لما مرضيوش يساعدهو بيبي بيت له .. ولما محدش فيهم رضي يخليه يستخبى عنده في بيته .. وشاله الفيل ودخله بيته وغطوه وعالجوه لحد ما حالته اتحسننت .. واعتذروا له عن أنانيتهم .. وساعدهو أنه بيبي بيت كبير وجميل له .. ورجعوا تاني أصدقاء بيحبوا بعض وبيخافوا على بعض.

حدوتة (٣٧) شجرة شهاب

الهدف منها توعية الأطفال بأهمية الأشجار للحفاظ على البيئة

كان يا ما كان كان في زمان ولد جميل اسمه شهاب .. شهاب ولد مؤدب وبيحب مدرسته وبيذاكر دروسه وينجح بتفوق .. لأنه نفسه بيقى دكتور لما يكبر علشان يعالج أي مريض .. ودة لأنه ما بيحبش يشوف أي حد بيتألم من أي وجع .. وفي يوم من الأيام كان شهاب راجع من مدرسته .. شاف جارهم عمو إبراهيم قدام بيته .. جايب فأس كبير وأدوات تانية وواقف جنب الشجرة اللي زرعه شهاب قدام البيت مع باباه من فترة زرعه .. استغرب شهاب جدا من المنظر .. وقرب من عمو إبراهيم وقال له .. السلام عليكم .. رد عم إبراهيم عليكم السلام .. أزيك يا شهاب يا ابني .. سأله شهاب .. هو حضرتك هتعمل أيه بالفأس والأدوات اللي معاك دي؟ .. رد عمو إبراهيم وقال ها أقطع الشجرة دي .. ها أكسرها وأشيلها من هنا خالص.

اتصدم شهاب لما سمع ان الشجرة بتاعته اللي زرعه بأيديه .. وعلى طول بيسقيها عشان تكبر وما تدبلش هتقطع!! .. وماعرفش يتصرف أزاى مع جاره .. جري شهاب بسرعة على شقتهم وحكى لباباه على اللي شافه وهو بيعيط .. وقال له أرجوك يا بابا اتصرف .. أمنع عمو إبراهيم أنه يعمل كدة .. رد باباه وقاله طبعا لازم نمعه .. تعالى معايا .. راح شهاب مع باباه لجارهم عم إبراهيم .. لاقوه ماسك في ايدي الفأس وخلص هيبدا في قطع الشجرة .. قال له بصوت عالي استنى يا إبراهيم .. أنت هتعمل أيه؟ .. قال له زي ما أنت شايف .. ها أقطع الشجرة دي .. قال له وعايز تقطعها ليه؟ .. رد وقال أصلها بصراحة كبرت أوي وفروعها طولت وضيق المكان .. ومابعرفش أركن عربيتي بسببها .. وكمان لما بيجي الخريف وورقها بينشف ويقع .. بيوسخ الأرض وبتشوه المنظر قدام العمارة .. أنا شايف أنها مالهش لازمة .. عشان كدة قررت أشيلها.

رد بابا شهاب عليه وقال له .. لا طبعا لها لازمة وفايدة كبيرة كمان .. أولا الشجرة من النباتات يعني كائن حي حرام تقطعها وتموتها .. ثانياً الشجر الأخضر بيدي منظر جميل وبيزين شكل المكان وكمان الورق الأخضر اللي في الشجر بيبقي الجو من الأتربة والدخان اللي منتشر فيه من العربيات والمصانع .. لأنه بيمتص غاز ثاني أكسيد الكربون .. وبيدينا غاز الأوكسجين اللي بنتنفسه .. واللي ضروري لينا عشان نقدر نعيش .. ودة دليل على قدرة ربنا العظيم اللي خلق الكون كله .. دة غير إننا بنستفيد من ظلها في الأيام اللي بيبقي فيها حرارة الشمس قوية وحرارة .. حتي الحيوانات والطيور بتستفيد من ظلها .. بعد دة كله ونقول الشجرة مالهش لازمة .. إزاى؟

وقف عم إبراهيم وهو مندهش من كلام بابا شهاب .. إزاي هو ما فكرش في فوايد الأشجار قبل ما يفكر في قطعها .. بقي مكسوف من نفسه .. ومش عارف يرد يقول أبيه .. وحط الفأس على الأرض ووقف ساكت .. بابا شهاب قال له أنا عندي فكرة .. احنا ممكن نتفق مع الجانيين يجي مرة في الشهر يقص فروعها الطويلة ويقلمها كويس عشان لما يجي الخريف ورقها الناشف ما يقعش ويشوه المنظر .. أيه رأيك؟ رد عم إبراهيم بسرعة موافق .. طبعا موافق .. فرح شهاب جداً جداً من باباه وكلامه المفيد .. لأنه هو كمان استفاد وعرف فوايد الأشجار .. وبقي بيحب شجرته دلوقتي أكثر كمان .. وأتعلم من باباه أن لما يشوف حد بيعمل سلوك أو تصرف غلط هيضره ويضره اللي حوالية لازم يمنعه ويفهمه بهدوء أن اللي بيعمله دة غلط مش يسكت ويقول وأنا مالي.

حدوتة (٣٨) يونس ولد عنيد

الهدف منها حث الأطفال للابتعاد عن العند وطاعة الأم والأب .

كان يا ما كان .. كان فيه زمان .. ولد اسمه يونس .. يونس كان ولد جميل .. لكن مامته كانت دايمًا تشتكي منه أنه مش بيحب يسمع كلامها .. وبيعند وينفذ اللي هو عايزه .. أصل يونس دلوقتي كبير حبة وشايف أنه بقي له رأي وبيفكر ودي مش حاجة وحشة .. لكن الوحش أنه بيبقى عايز يعمل أي حاجة تيجي في دماغه حتى لو مامته منعتة عنها لأنه ممكن يأذي نفسه ويضرها .. ما كنش بيسمع كلام مامته وبيعند معاها .. أنه لازم ولا بد يعمل اللي هو عايزه .. وكان الموضوع ممكن يوصل للعباط والصراخ .. مامته كانت بتضايق من تصرفاته دي وكانت بتصر أكثر على أنه ينفذ كلامها .. وهو يعند أكثر ويصمم على عدم سماع الكلام.

اختلفت مامته معاها .. وأخيراً توصلت لحل .. قررت أنها لما تقول له على حاجة يعملها مثلاً تفهمه الأول هي عايزاه يعملها ليه .. وأنها ها تقول له الأمر مرة واحدة .. وتسببه يتحمل نتيجة العند .. مرة في الثنا كانوا خارجين رايعين النادي .. مامته اختلفت له هدم ثقيلة وجاكت ثقيل عشان يلبسه .. وقالت له ألبس اللبس دة لأن الجو برد برة البيت .. يونس رفض يلبس الجاكت .. لكن ما قالش لمامته أنه لو لبس الجاكت مش ها يعرف يتحرك ويلعب مع أصحابه .. ورفض تماماً أنه يلبسه .. مامته سابتة على راحته .. لكن أخذت الجاكت معاها في العربية .. ولما وصل يونس النادي لقي نفسه بردان جدا وبدأ يترعش من السقعة وجري على مامته وقال لها فين الجاكت يا ماما؟ أنا ها أموت من البرد .. مامته قالت له هااا صدقت كلام ماما .. سكت يونس وما ردهش لأنه أتكسف منها.

ومرة تانية وهما في البيت مامته جهزت الغدا وحطت الأكل على السفرة .. وندهت على يونس عشان يجبي يتغدا لكن يونس رفض .. وقال لها أنا مش عايز أكل أنا مش جعان .. مامته ما تحايلتش عليه زي كل مرة وسابته برود على راحته .. وهو صمم أنه ما ياكلش .. لحد ما جه وقت النوم ودخل ينام معرفش ينام ولقى بطنه بتوجهه من الجوع .. جري على المطبخ يدور على أي حاجة ياكلها بسرعة .. لكن أصعب مرة بقي واللي أتعلم فيها درس قاسي .. لما كان عايز يمسك السكينة ويقطع بيها الفاكهة لوحده .. ولما مامته قالت له لا يا يونس .. أنت ممكن تعور نفسك .. كدة غلط .. أنت لسة صغير .. اتضايق يونس جدا وما سمعش كلام ماما وأخذها عند وأصر يمسك السكينة ويقطع التفاحه لنفسه .. أيده أتعورت جرح كبير ونزل دم كثير .. مامته وباباه خدوه بسرعة وراحوا المستشفى.

ومرة في مرة حس يونس أنه لما ما بيسمعش كلام مامته وبيعند معاها هو اللي بيخسر في الآخر .. وبرودو بيطلع كلام مامته اللي صح .. مامته قعدت وأتكلمت معاها وفهمته أنها بتشوف الأمور صح أكثر منه لأنها أكبر منه .. لكن مفيش مانع أنه يتكلم مع مامته ويقول رأيها لها .. وليه عايز يعمل كذا أو مش عايز يعمل كذا .. ويتناقش مع مامته وهي ها تفهمه الصح فين .. لأنها أكثر واحدة بتحبه وبتخاف عليه في الدنيا كلها.

حدوتة (٣٩) القرد الشقي والعصافير

الهدف منها توعية الأطفال للابتعاد عن الأناية

كان يا ما كان .. كان في زمن قرد شقي اسمه قروود .. وقروود بيتمشي في الغابة في يوم من الأيام لقي حبل نسيه صياد كان بيصطاد غزلان في الغابة .. أول ما قروود شاف الحبل فرح أوي .. وقال أنا جت لي فكرة حلوة .. ممكن أعملها بالحبل ده .. أنا هاخذ الحبل ده أعمله مرجيحة جميله ألعب بيها وأتمرجح عليها .. وبسرعة أخذ قروود الحبل وربطه في الشجرتين وراح جاب حبة موز .. وقال يا سلام أنا ها أقعد بقي أتمرجح وأكل الموز .. وطلع قروود الشجرة وقعد على المرجيحة الجديدة بتاعته .. وقعد يتمرجح وكان فرحان جدا ومبسوط .. بدأ يتمرجح جامد والشجرتين بقوا بيتهزوا جامد من قوة المرجيحة.

كان فيه عصافير عاملين عششهم وبيوتهم على الشجر ده .. وكل ما الشجر يتهز كانت بيوتهم وعششهم بتتهز كمان .. العصافير اتضايقت جدا وقالت للقرد أن كده ما ينفعش .. لأن بيوتهم بتتهز وفيها البيض بناعهم وممكن بيوتهم تقع والبيض اللي فيها يتكسر .. قروود قال لهم وأنا مالي .. أنا أعمل لكم أية؟ .. المهم أن أنا مبسوط بالمرجيحة بتاعتي .. راحت العصافير لأصحاب القرد الدب والحمار الوحشي واشتكوا لهم من القرد .. وطلبوا منهم أنهم يحاولوا يقتعوه أن ما ينفعش يبقى هو مبسوط وبيتمرجح .. والعصافير تبقى مش مبسوطه وخايفة على بيوتهم والبيض بتاعهم.

مقتنعض القرد بكلام أصحابه وقال لهم وأنا مالي .. المهم أكون أنا مبسوط .. وتاني يوم أخذ القرد شوية موز ورايح على المرجيحة بتاعته عشان يتمرجح تاني .. وطلع المرجيحة وبدأ يتمرجح جامد وقعد يغني وفرحان وفجأة وقع عش من عشش العصافير على الأرض وأتكسر البيض اللي فيه كمان .. العصافير اتضايقت جدا وقعدت تبكي وتصرخ .. وهو ولا حاسس .. وعمال يغني .. لحد ما وقعت خلية للنحل كانت مبنية على فرع من فروع الشجرة اللي مربوط فيها حبل المرجيحة .. غضب النحل جدا وقرروا يعلموا القرد درس قاسي وهجموا على قروود وهو بيتتمرجح .. وفضلوا يقرصوه من ودانه وراسه ووشه .. وفضل قروود يتألم ويحاول يمنعهم بأيديه .. لكن ما قدرش .. وأختل توازنه .. ووقع من فوق المرجيحة على الأرض .. وراسه اتخبطت بحجر كبير واتجرحت جرح كبير.

فضل القرد يصرخ بصوت عالي من شدة الألم ويقول إحقوني .. أنقذوني .. أصحابه الدب والحمار الوحشي سمعوه وجريوا عليه وشالوه ووصلوه لحد مامته .. مامته اتخضت جدا وعالجت له الجرح اللي في راسه .. ولما عرفت سبب اللي حصله زعلت منه .. وقررت تحبسه في البيت وما يخرجش يلعب بره البيت .. مادام مش بيفكر غير في نفسه وبس .. ومش بيراعي أنه ميأديش حد .. وقالت له يعني أنت تلعب وتتبسط وغيرك يتأدي .. كده أنت تبقى أناني وبتحب نفسك وبس .. وأديك أخذت جزائك على اللي عملته.

اعتذر قروود لمامته وقال لها أنا أسف يا ماما سامحيني .. أنا خلاص أتعلت درس قاسي أوي .. ومسك راسه وهو بيتألم وقال أه يا راسي .. أوعدك أني مش ها أعمل كده تاني .. وها أبطل أبقى أناني .. وها أروح بكرة للعصافير وأعتذر لهم على اللي عملته وها أساعدهم أنهم بينوا بيت جديد لهم .. أتبسطت مامته منه وأخذته في حضنها وقالت له برافو عليك يا قروود .. أنت كده صح .. الانانية صفة وحشة وها تخلى كل اللي حواليك يكرهوك.

حدوتة (٤٠) الملك الطماع والجوهرة

الهدف منها حث الأطفال الابتعاد عن الطمع

كان ياما كان .. كان فيه زمان .. ملك عايش في قصر كبير قدامه جنية واسعة مزروعة بالزهور والخضروات والفاكهة .. وكان عنده جنائني مسئول عن الجنية دي .. هو اللي بيزرعها ويسقيها ويلم الحشائش ويقلم الشجر .. وفي يوم من الأيام طلب الملك من الجنائني أنه يزرع له شجرة مانجا .. وفي تاني يوم أخذ الجنائني الفاس بتاعه وأختار مكان فاضي .. وبدأ يحفر بالفاس عشان يزرع شجرة المانجا اللي طلبها الملك .. وهو يحفر .. فجأة ..

لقى جوهرة مدفونة في الطين .. فرح الجنائني جدا .. ولأنه كان أمين .. قال أنا لازم أديها للملك صاحب القصر والجنينه .. وفعلا أخذ الجوهرة وجري على الملك وأدها له وقال أنه لقي الجوهرة دي مدفونة في أرض الجنينة وهو يزرع شجرة المانجا.

فرح الملك جدا بالجوهرة .. وبدأ يفكر بطمع .. وأمر الجنائني أنه يحفر ثاني في المكان دة يمكن يلاقي جواهر ثاني .. سمع الجنائني كلام الملك وبدأ يحفر ثاني .. وهو يحفر لقي جوهرة ثانية .. فرح جدا وجري أدها للملك .. الملك فرح جدا وقال له أحفر ثاني .. فضل الجنائني يحفر لحد ما تعب .. وراح للملك وقال له أنا تعبت أوي من الحفر ومش لاقى جواهر ثاني .. ممكن اروح استريح في بيتي وأجي بكرة بدري أكمل حفر .. الملك رفض وقال لا .. أحفر ثاني .. أحفر في كل الجنينة .. قال الجنائني أزاي بس والزهور والفواكة والخضروات المزروعة .. قال له مش مهم .. أحفر بالفاست اني وشيل كل الشجر والزرع المهم تلاقى جواهر ثاني.

فضل الجنائني يحفر وهو زعلان وحزين .. لأن الملك صاحب الجنينة الطمع عماه .. وها يخليه يهد الجنينة اللي عملها الجنائني بأيديه وتعب فيها شهور وسنين .. كان صعبان عليه تعب ومجهوده في زرع كل شجرة وكل وردة بأيديه .. راح للملك وقال له مش لاقى ولا جوهرة ثاني .. غضب الملك جدا .. وقال له أنت اللي مش عارف تحفر كويس .. وبعث جاب عشر عمال وطلب منهم يحفروا الجنينه كلها ميسبوش فيها شبر واحد لحد ما يلاقوا الجواهر كلها .. فضل العمال العشرة يحفروا يحفروا لحد ما الجنينة كلها مبقاش فيها مكان ما تحفرش ويردو ما لقوش ولا جوهرة ثاني.

بص الملك فجأة للجنينة .. وأتصدم لما لقي الجنينة الجميلة بتاعته اللي كانت مليانة شجر فواكة وخضروات وزهور أشكالها وألوانها جميلة .. بقت عبارة عن حفرة كبيرة شكلها وحش جدا .. وقعد يتحسر على الجنينة الجميلة بتاعته وأتضايق جدا من نفسه .. أن طمعه هو اللي خلاه يضع الجنينة بتاعته في لحظة .. وندم جدا على اللي عمله لكن بعد فوات الأوان.

حدوتة (٤١) حكاية عم شعبان

الهدف منها توعية الأطفال بأهمية التعليم

كان يا ما كان .. كان فيه زمان .. راجل طيب أوي اسمه عم شعبان .. كان عم شعبان .. بيشتغل حارس بوابة في مدرسة ابتدائية .. وكان كل الأطفال في المدرسة يحبوه جدا .. لانه طيب وحنين ويحب كل الأطفال وبيفرق عليهم بنبوني عشان يشجعهم ويحبهم في المدرسة .. وكانوا الأطفال ييجروا عليه .. ويقعدوا جنبه بعد ما اليوم الدراسي يخلص .. وكان بيقد يحكي لهم حكايات ومواقف بتحصل معاه .. وكانوا بيسمعوه ويركزوا في كلامه وهو بيحكي .. لأن القصص بتاعته شيقة جدا.

وفي يوم من الأيام أتجمع أولاد كثير حوالين عم شعبان .. وقال لهم أيه رأيكم يا أولاد .. أنا هحكي لكم النهاردة حكاية غريبة شوية .. رد الأولاد كلهم في صوت واحد .. موافقين يلا أحكي لنا بسرعة .. ضحك عم شعبان وقال لهم .. حاضر حاضر .. بس الأول أنا ها أقول لكم على سر أول مرة أقوله لحد .. فرح الأولاد وقالوا له قول يا عم شعبان شوقتنا .. قال لهم تصدقوا يا أولاد أنا كنت في يوم من الأيام تلميذ في المدرسة دي .. الأولاد كلهم استغربوا وقالوا معقول؟!.

قال لهم بصوا يا أولاد .. أنا لما كنت صغير ما كنتش بحب المدرسة خالص .. وما كنتش بحب المذاكرة كمان .. وكان أمنية حياتي أنهم في يوم يلغوا التعليم أصلا ويقفلوا المدارس اللي في البلد كلها .. ولأني ماكنتش بذاكر كنت على طول بجيب صفر في كل الامتحانات .. ولما بابا ومامتي تعبوا وزهقوا مني خلوني أقعد في البيت وأسبب المدرسة .. وقالوا لي مدام مش ها عايز تتعلم في المدرسة يبقى تروح تتعلم شغلانة أحسن .. وفعلا روحت اشتغل عند حلاق جارنا .. بس كان على طول بيشتمني وبيضربني لو عملت أي حاجة غلط .. سيبته وروحت اشتغل في محل بيع الخضروات وفواكة .. بس صاحب المحل كان بيخليني أشيل حاجات ثقيلة أوي ..

وماكنتش بقدر وتعبت فامشيت من المحل وسيبته .. واشتغلت فترة في محل جزارة .. بس الجزار كان راجل عصبي أوي .. وفي مرة نسيت أعمل حاجة كان طالبيها مني ضربيني جامد أوي واتجرحت في أيدي جرح كبير لسة سايب أثر في أيدي لحد دلوقتي.

وقعدت أتنقل من محل لمحل لحد ما كبرت .. ورجعت لمدرستي .. بس المرة دي مش تلميذ .. لا رجعت مدرستي اشتغل فيها حارس .. بعد ما كنت في يوم من الأيام تلميذ فيها .. وأصحابي اللي كانوا معايا زمان بقوا دكاترة ومهندسين وموظفين .. بشوفهم وهما بيحببوا ولادهم المدرسة هنا .. ودايما بيقولوا لي أننا بنبقى مطمئنين علي أولادنا علشان هما معاك هنا في المدرسة .. عشان كدة يا أولاد أنا بحب أشجعكم تحبوا المدرسة .. وحكيت لكم حكايتي تتعلموا منها .. أو عوا يا أولاد تعملوا زي ما أنا عملت .. خلي بالك من مذاكرتكم .. ويا رب أشوفكم أحسن ناس في الدنيا .. أو عوا في يوم تنسوا حكاية عمك شعبان.

حدوتة (٤٢) سلمى وخروف العيد

الهدف منها : توضيح الهدف من ذبح الأضاحي في العيد للأطفال

كان يا ما كان .. كان فيه زمان بنت اسمها سلمى .. كانت سلمى بنت جميلة وبتحب الحيوانات أوي وبتعاملهم بكل حنية وبتعطف عليهم .. ولما قرب عيد الأضحي باباها قال لها إنه إن شاء الله ها يشتري السنة دي خروف .. فرحت سلمى جدا .. وبعدها طلبت من مامتها تدي لها طبقين واحد عشان تحط فيه الأكل للخروف وواحد عشان تحط فيه الميه .. ووقفت في الشباك مستنتية باباها وهو راجع وفي أيده الخروف .. وأول ما باباها رجع طلعت سلمى بسرعة على سطح العمارة في المكان اللي هيحطوا فيه الخروف .. وحطت أكل وميه للخروف ووقفت جنبه تبص له بحب وتمسح على فروته البيضاء النظيفة الجميلة.

أتلقت سلمى جدا بالخروف .. وكانت بتعتني بيه جدا ويوم العيد صحيت سلمى بدري ولبست اللبس الجديد بتاعها .. وراحت مع مامتها وباباها عشان تصلي صلاة العيد في الجامع اللي جنب بيتهم .. ولما رجعت البيت استأذنت من باباها أنها ها تقعد حبه جنب الخروف تأكله وتشربه مياه وبعدين تنزل .. ولما جه الجزار عشان يدبح الخروف قعدت سلمى تصرخ .. وتقول لهم أنتم ها تعملوا أيه في خروفي .. حرام عليكم سببوه وقعدت تعيط بشدة .. باباها أفكر أنه ما فهمهاش أنه جايب الخروف ده يضحى بيه في عيد الأضحي .. وسلمى افكرت باباها جايبه عشان تربيته وتعتني بيه لأنه عارف أنها بتحب الحيوانات .. أخذها باباها على جنب وفهمها أن السنة دي ربنا رزقه بفلوس كثير .. عشان كدة قرر يشتري خروف ويضحى بيه في العيد .. ويفرق لحمته على الفقراء والمساكين .. زي ما سيدنا إبراهيم عمل لما شاف في اللحم انه بيدبح ابنه سيدنا إسماعيل .. وفهم أن دة أمر من ربنا .. ولما جه سيدنا إبراهيم ينفذ أمر ربنا ويدبح ابنه سيدنا إسماعيل .. ربنا فداه بخروف كبير .. ودبح الخروف بدل ما كان هيدبح ابنه.

ولما باباها خلص كلامه لاحظ أن سلمى هديت وبطلت عياط .. باباها طلب منها تقف جنبه وتشوف الخروف وهو بيدبح وتدعي ربنا يتقبله منهم .. وبعد ما الجزار خلص عملية الذبح والتنظيف .. طلب باباها من سلمى أنها تاخذ اللحم وتوزعها بنفسها على المساكين والمحتاجين .. فرحت سلمى أوي بالمهمة دي .. وفرحت أكثر لما شافت الفرحة في عيون الفقراء والمساكين اللي كانت بتديهم اللحم .. ودعت ربنا أنه يرزق باباها السنة الجاية بفلوس كثير عشان يقدر يشتري خروف ثاني ويدبحوه في عيد الأضحي الجاي.

حدوتة (٤٣) الفيل نونو

الهدف منها توعية الأطفال بمعنى الصداقة

كان يا ما كان كان في زمان فيل صغير اسمه نونو .. نونو كان هادي وطيب أوي .. مشكلته الوحيدة أنه ماكنش عنده أخوات وكمان ما فيش أفيال غيره في الغابة دي .. فا كان بيحس دايما أنه وحيد ومش بيلاقي حد يلعب معاه

.. وفي يوم من الأيام وهو ماشي لقي كرة .. الظاهر أن كان فيه حد يلعب بيها في المكان ومشى ونسيها .. الفيل نونو قعد يدور يمكن يلاقي صاحبها .. مالقاش حد خالص .. فأخذها وفرح جدا بيها .. وقال كويس أهو العب بيها بدل ما أنا قاعد وحيد ومش لاقى حد يلعب معايا.

قعد يلعب بالكورة حبة وبعدين زهق .. وقال لنفسه انا مش عارف ألعب بالكورة لوحدي .. لو الأقي بس حد يلعب بيها معايا يشوطها لي وأشوطها له .. نعمل ماتش مثلا .. نرميها لبعض مثلا .. كنت ها أتبسط أكثر .. بدل ما أنا قاعد ألعب بيها لوحدي .. وبابا وماما كبار وحجمهم ضخم مش ها يعرفوا يلعبوا معايا .. الفيل نونو قعد شوية زعلان .. وبعدين قال جت لي فكرة .. أنا لازم يبقى عندي أصحاب ألعب معايم وأنكلم معايم .. مش لازم يكونوا أفيال زيي يعني .. ممكن يكونوا حيوانات ثانية عادي .. مشى يدور في الغابة على أي حيوان ويعرض عليه أنهم بيقفوا أصحاب ويلعب معاه بالكورة بناعته.

وهو ماشي قابل القرد بيطنط على الشجرة .. قال له أزيك يا قرد ممكن نبقى أصحاب ونلعب مع بعض بالكورة دي .. القرد قال الله أيه الكرة الجميلة دي .. ياريت كان ينفع ألعب معاك بس للأسف أنا حتمي صغير وأنت ضخم .. أخاف وأحنا بنلعب ماتشوفنيش وتدوس عليا برجلك وأنت مش واخذ بالك .. الفيل نونو زعل جدا واتضايق ومشى يدور في الغابة علي حد ثاني وفجأة لقي غزالة صغيرة ماشية .. قرب منها وطلب منها بيقفوا أصحاب وتلعب معاه بالكورة .. الغزالة بصت له وقالت ياريت كان ينفع ألعب معاك لكن أنا حتمي صغير زي ما أنت شايف .. وأنت حجمك ضخم وكبير .. وأخاف وأحنا بنلعب تخبطني وأقع على الأرض أو تدوس عليا.

الفيل زعل أكثر واتضايق أكثر وراح قعد يعيط تحت شجرة .. وقعد يبص على الغزالة وهي ماشية فجأة وقعت في حفرة كبيرة .. الحفرة كانت فخ من اللي بيعملوه الصيادين عشان يصطادوا الغزلان .. الفيل نونو قام بسرعة وقال أنا لازم أساعدها قبل ما الصياد يجي ويأخذها .. وبالفعل جري الفيل نونو على الحفرة ونده للقرد وقعدوا يحاولوا يساعدها عشان تخرج .. الفيل نونو مد لها زلومته وقال لها أمسكي فيها كويس وقعد يشدها لحد ما خرجها هو والقرد .. قبل ما الصياد يشوفها وجريوا بسرعة من المكان .. الغزالة وهي بتشكر الفيل نونو على مساعدتها وبتبص له شافت دموعه على وشه.

قالت له أيه دة أنت كنت بتعيط .. أنا أسفه بجد إنني زعلتك .. أنا موافقة ألعب معاك بالكورة .. والقرد قال خلاص ألعبوا أنتم ماتش وأنا أفق على الشجرة وأبقى الحكم .. الفيل نونو قعد يضحك وقال لهم موافق وهخلي بالي منك وأنا بجري عشان ما أخطكيش .. قالت له ماشي .. ومن النهاردة أحنا التلاته ها نبقى أصحاب على طول وهنلعب كل يوم مع بعض .. فرح الفيل نونو جدا أنه أخيرا بقى عنده أصحاب يلعبوا معاه .. وأنه خلاص ما بقاش وحيد.

حدوتة (٤٤) ودان حسام

الهدف منها زرع ثقة بالنفس وعدم التأثر بسخرية الآخرين

كان يا ما كان .. كان فيه زمان ولد اسمه حسام .. حسام ولد جميل ومؤدب وشاطر لكن كان عنده مشكلة .. المشكلة هي ودانه .. ودانه كانت كبيرة شوية .. وأصحابه في المدرسة بيتريقوا على شكل ودانه .. وبيقولوا له دي شبه ودان الأرنب .. وكل مكان يروحه حسام يلاقي الناس بتتلفت عليه .. والأطفال بيكلموا بعض ويشاوروا عليه .. بيعرف حسام على طول أنهم أكيد بيتكلموا على ودانه الكبيرة.

حسام كان بيحب القراءة وكان بيشتري كتب ومجلات وقصص ويقعد في الحديقة اللي قدام بيتهم تحت شجرة كبيرة .. يقعد يقرأ ويقرا .. كل ما باباه يدي له مصروف يجيب بيه حاجة حلوة لنفسه زي باقي الأطفال .. كان حسام بيروح يشتري بيه كتب ومجلات .. ولما صحابه بيشفوفه هو بيقرأ تحت الشجرة .. كانوا بيقدوا يتريقوا عليه ويقولوا أنت فاكتر نفسك ها تطلع أيه يعني .. ويقعدوا يضحكوا علي ودانه الكبيرة.

كان حسام في الأول بيتضايق من كلامهم السخيف .. وفي يوم قرر حسام أنه ما يضايقش نفسه بكلامهم وما يهتمش بأي تريقة يقولوها عليه .. وركز في مذاكرته ودروسه لحد ما أخرج من الجامعة .. وبقي دكتور كبير وعمل اختراع مفيد واكتشف حاجات علمية جديدة وبقي عالم مشهور .. وفي يوم وأصحابه بيتفرجوا على التلفزيون .. شافوا حسام في التلفزيون بيعمل حوار مع المذيعة وبيتكلم عن اختراعه الجديد اللي هيفيد ناس كتير .. وكان بيتكلم عن أزاى حبه للقراءة وللعلم هو اللي وصله للاختراع العلمي الجديد ده .. أصحابه ما بقوش مصدقين عينيهم وكانوا ها يتجننوا .. وقعدوا يقولوا لبعض بقى حسام أبو ودان كبيرة زي الأرنب بقى عالم مشهور وبيطلع في التلفزيون وأحنا لا .. كانوا مكسوفين من نفسهم لأن مافيش واحد فيهم قدر يعمل زيه أو يوصل للي حسام وصل له .. لأن أغلبهم ساب المدرسة .. وما كملوش تعليمهم.

أتضايقوا جدا من نفسهم .. وقرروا يكلموا الدكتور حسام ويطلبوا يقابلوه عشان يعتذروا له .. وفعلا قابلوه وطلبوا منه يسامحهم على كل التريقة والكلام السخيف اللي كانوا بيقولوه عليه زمان وهو صغير .. الدكتور حسام قال لهم أنا مسامحك على الرغم من أنكم كنتم بتحاسبوني على شكلي وبتتريقوا عليا .. ومش أنا اللي خلقت نفسي بالشكل ده .. وماكنش بأيدي حاجة أعملها .. قالوا له أحنا دلوقتي بس عرفنا الكلام ده .. زمان كنا صغيرين ومش فاهمين .. أرجوك سامحنا.

حدوتة (٤٥) فريدة و الورد

الهدف منها حث الأطفال على عدم قطف الأزهار والورود من الحدائق

كان يا ما كان .. كان فيه زمان بنت اسمها فريدة .. فريدة بنت جميلة ومؤدبة وطيبة .. لكنها كانت بتحب تقطف الورد من الحديقة اللي قدام بيتهم .. كانت كل ما تلاقي وردة جميلة طلعت في الحديقة .. تجري وتقطفها .. مامتها قالت لها كدة غلط يا فريدة .. الورد من النباتات يعني كائن حي حرام نقطفه ونموته .. وبعدين الورد بيزين شكل الحديقة وبيخلي شكلها جميل .. لكن فريدة ما كنتش بتسمع كلام مامتها وقالت لها يا ماما أنا بحب أشم ريحه الورد أوي .. بيبقى ريحته حلوة .. مامتها قالت لها ماشي يا ستي شميها براحتك .. لكن سيبها في الفرع بتاعها مش لازم تقطفها .. وبعدين المفروض لما نشوف حاجة جميلة زي الورد .. نقول سبحان الله ونسيبها عشان غيرنا يشوفها ويستمتع بجمالها ويسبح ربنا .. أيه اللي ها تستقيديه لما تقطفها وتشميها شوية وترميها في لما تدبل؟ .. ليه ما تسيبهاش تكبر ويطلع غيرها وغيرها وتبقى الحديقة مليانه ورد وشكلها جميل.

وفي يوم من الأيام صحيت فريدة من النوم وراحت تبص من الشباك بتاع أوضتها .. لقت وردة لونها أصفر جميله جدا في الحديقة اللي قدام بيتها .. جريت بسرعة على الحديقة تشوف الوردة وتشمها .. لقت ريحتها حلوة أوي .. مدت أيدها عشان تقطفها بسرعة وبدون تفكير زي ما هي متعودة .. أخذتها ودخلت البيت ولما مامتها شافتها في أيديها .. زعلت جدا منها وقالت لها بردو يا فريدة .. أنا مش فهمتك أن كدة غلط .. ردت فريدة أصل شكلها عجبنى أوي يا ماما وعائزة أزين بيها الأوضة بتاعتي وأحطها علي مكتبي .. طلعت فريدة أوضيتها وقعدت تشم شوية في الوردة وحطيتها على مكتبها ونسيتها وقعدت تلعب بالعبها وقضيت يومها عادي جدا.

ولما جه ميعاد نومها .. راحت على سريرها وحطت دماغها على مخدتها .. وفجأة سمعت صوت حد بيعيط .. اتخضت فريدة وقامت تدور الصوت ده جاي منين؟ صوت العياط لسه شغال وهي مش عارفة ده صوت مين .. قعدت تقرب من المكتب لقت الوردة الصفرا اللي قطفتها الصبح دبلانه وعمالة تعيط .. سألتها فريدة مالك يا وردة هو أنتي اللي بتعيطي .. بتعيطي ليه بس؟؟ ردت الوردة وقالت يعني مش عارفه بيعيط ليه؟ حرام عليك أنا عملت لك أيه عشان تقطفني وتموتيني .. أنا ربنا خلقتي عشان أزين لكم الدنيا ولما تشوفوني وتشموا ريحتي وتستمعوا بشكلي وتنبسطوا وتقولوا سبحان الله .. ليه زي ما أنتي شوقتي وشمتيني محافظتيش عليا وسيتيني للناس التانية تشوفني ويتبسطوا ويسبحوا ربنا هما كمان؟؟ دلوقتي أدكي قطفتي وما سبتنيش أكبر وأوراقي تتفتح .. أديني دبلت ومش لاقيه أكل أو شرب وبموت وبكرة ترميني خلاص .. ليه بس كدة ليه؟

تأثرت فريدة بكلام الوردة لدرجة أنها بكت عليها وقالت لها خلاص سامحيني والله لو أقدر أرجعك الفرع بتاعك تاني كنت رجعتك .. وفجأة صحيت فريدة من النوم وأكتشفت أنها كانت بتحلم .. وقامت مخموضة ولقت نفسها عمالة تقول .. أوعدك من النهاردة مش ها أقطف ورد تاني .. أوعدك من النهاردة مش ها أقطف ورد تاني .. جريت فريدة ناحية المكتب بتاعها ومسكت الوردة الصفرا الدبلانة وباستها وقالت لها سامحيني أنا مش هقطف ورد تاني خلاص.

حدوتة (٤٦) الفراشة المغرورة

الهدف منها توعية الأطفال بالفرق بين دور النحلة والفراشة

كان يا ما كان .. كان فيه زمان فراشة جميلة وعندها أجنحة ملونة بألوان زاهية .. كانت الفراشة مغرورة جداً بنفسها أجنحتها الملونة .. وطول اليوم تنتقل بين الأزهار والورود وتتباهى بجمالها وبأجناحتها .. وفي يوم من الأيام وهي واقفة على زهرة من الأزهار جت وفتت جنبها نحلة .. بصت النحلة للفراشة وابتسمت وقالت لها أزيك يا فراشة يا جميلة ممكن نبقى أصحاب .. ردت عليها الفراشة بطريقة سخيفة وقالتلا طبعاً مش ممكن نبقى أصحاب .. أنا فراشة جميلة وأجنحتي ملونة بالأحمر والأصفر والأخضر والأسود والموف لكن أنتي يا عيني لونك أصفر وأسود بس .. أنا كل الناس اللي بنشوفني بيتجنن عليا وعلى ألواني ويقعدوا يقولوا سبحان الله .. لكن أنتي بقي بيقولوا عليك أيه؟ .. وقعدت تضحك و طارت لزهرة تانية.

النحلة وفتت مضايقة شوية .. وبعدين قالت لنفسها أيه الفراشة المغرورة دي؟ ..أنا لازم أعلمها درس ما تنسهوش ويخليها تبطل غرور .. طارت وراها النحلة ووقفت جنبها .. وقالت لها على فكرة شكلي دة أنا ماليش دخل بيه لأن مش أنا اللي خلقت نفسي .. ربنا اللي خلقتي كدة .. لكن أنتي بقي دورك أيه؟ .. أيه الوظيفة اللي بتعملها عشان الناس تحبك؟ طول اليوم بتقعدني تنتقلي من زهرة للتانية وبس .. ردت الفراشة أنا ساعات كثير بنقل حبوب اللقاح بين الزهور .. كملت النحلة كلامها وقالت لكن أنا طول اليوم بفضل أنتقل بين الزهور وأجمع رحيق الزهور عشان أنتج العسل الأبيض اللي بيشفى الناس من الأمراض .. عشان كدة لو سألتني الناس هتلاقهم بيحبوني أنا أكثر منك .. لكن أنتي الناس بتتفرج على ألوانك الجميلة وبس .. وشوية نور ممكن يحرقوكي وتموتي .. أنتي ليه مغرورة كدة؟ و طارت النحلة لبعيد.

فضلت الفراشة تفكر في الكلام اللي النحلة قالته وحسيت أن النحلة فعلا عندها حق في كلامها .. فقررت تروح للنحلة وتعذر لها ولسه هتطير ناحيتها .. لقت ولد صغير جايب شبكة وعايز يصطادها ويلعب بيها هو وأصحابه .. حاولت تهرب منه ماعرفتش .. وفعلا أخذها في الشبكة بتاعته قعدت الفراشة تصرخ بصوت عالي .. إلحقوني .. حد ينفذني .. إلحقوني .. سمعتها النحلة وطاربت بسرعة ناحية صوتها .. قالت لها الفراشة إلحقيني خرجيني من الشبكة دي .. الولد دة عجبني وألواني واصطادني عشان يلعب بيا .. النحلة قالت لها ماتخافيش .. ندهت النحلة بسرعة على مجموعة من النحل أصحابها وطاروا ناحية الولد وقعدوا يزنوا بصوت عالي ويلفوا حواليه الولد خاف منهم جدا .. ورمى الشبكة على الأرض وجري بسرعة عشان يهرب منهم قبل ما يقرصوه .. بعدها النحلة وأصحابها ساعدوا الفراشة وطلعوها من الشبكة.

الفراشة شكرتهم جدا انهم انفذوا حياتها و اعتذرت للنحلة على الرد السخيف بتاعها .و قالتلها. الولد اصطادني و انا كنت لسه هطير عشان اجيلك اعتذر لك انتي عندك حق .انا هبطل غرور.و عايزة نبقى اصحاب انا و انتي .و فعلا الفراشة و النحلة بقوا اصحاب جدا.

حدوتة (٤٧) نظارة سندس

الهدف منها : توعية الأطفال المصابين بضعف النظر بضرورة ارتداء النظارة الطبية بدون خجل

الهدف منها توعية الأطفال لمواجهة خطر ظاهرة الاختطاف

كان يا ما كان .. كان فيه زمان ولد اسمه مودي .. مودي كان ولد جميل ومؤدب وببسمع كلام مامته وباباه دايم .. لأنه عارف أنها أكثر واحدة بتحبه في الدنيا دي .. وعشان كدة بتخاف عليه .. وكانت دايم تقول له .. لما نخرج برة البيت لازم تمشي جنبى وماتسببش أيدي .. لأنك ممكن تبعد عني وتتوه .. وكمان فيه دلوقتي ناس وحشين بتأخذ الأطفال من مامتهم وتجري ويحبسوه في بيت من غير أكل أو شرب .. وممكن كمان يطلبوا من أهلهم فلوس عشان يرجعوا لهم ابنهم .. وممكن يلبسوهم هدوم قديمة ومقطعة ويمشوا بيهم في الشارع يطلبوا من الناس يساعدهم ويديبوا لهم فلوس .. عشان كدة يا حبيبي عايزاك تمشي جنبى على طول .. وماتبعدهش عني في أي مكان نروحه .. في الشارع أو النادي أو حتى السوبر ماركت .. ولأن مودي ولد مؤدب وببسمع الكلام كان بيقول لها على طول حاضر يا ماما.

وفي يوم من الأيام مامته وباباه خرجوا يشترروا حاجات من السوبر ماركت .. ومودي كان بيحب يروح السوبر الماركت أوي عشان بيحب لنفسه الشيكولاته اللي هو بيحبها .. ولما وصلوا المكان .. واشترت مامته طلبات البيت اللي هي عايزاها .. طلب منها مودي يروح ركن الحلويات عشان يجيب شيكولاتة .. مامته وافقت وراحت معاه طبعاً .. لقي بنوتة واقفه لوحدها .. وواحدة غريبة بتقرب منها وتساألها عن مامتها .. ردت البنوتة وقالت لها .. ماما مشغولة بتجيب طلبات البيت ... وأنا جيت أجيب لنفسى شيكولاتة لحد ما ماما تخلص .. قالت لها طيب تعالى أنا ها أختارك نوع شيكولاتة طعمه حلو أوي وها يعجبك وهاجيب لك منها كتير .. ونطلع نقعد برة شوية في الهوا عقبال ما مامتك تشتري اللي هي عايزاه.

البنوتة فرحت وقالت لها بس لازم أقول لماما عشان تدفع تمنها .. ردت عليها وقالت لها .. لا أنا اللي ها أدفع .. دي هدية مني ليكي .. ويلا بقي بسرعة عشان نخرج برة .. البنوتة قالت لها حاضر يا طنط .. كل دة ومودي بيتفرج علي البنوتة من بعيد .. مامته قالت له يلا يا مودي أنت واقف في مكانك ليه؟ روح يلا بسرعة هات الشيكولاتة بتاعتك عشان نمشي بقي .. مودي قال لها أصل يا ماما في حاجة غريبة حصلت مع البنوتة دي .. أنا حاسس أنها في خطر .. وحكى لمامته بسرعة عن اللي حصل .. مامته قالت لازم نمنعها بسرعة من أنها تخرج من هنا معاه .. ونبلغ أمن السوبر ماركت بسرعة.

راح مودي ومامته وطلبوا من البنوتة تستنى لأن مامتها بتدور عليها .. وأول ما سمعت كدة الست الغربية دي اللي كانت عايزة تخطفها .. سابت أيديها وحاولت تجري على البوابة عشان تخرج برة السوبر ماركت .. لكن بابا مودي كان بلغ الأمن ومسكوها بسرعة قبل ما تخرج .. ودوروا على مامتها البنوتة لقوها واقفة مشغولة ومأخذتش بالها أصلاً كل دة أن بنتها بعدت عنها .. كانت فاكراها واقفه جنبها زي ما هي قايلة لها .. مامتها أول ما عرفت اللي حصل وأن بنتها كانت ممكن تضيع منها قعدت تعيط وتحضن بنتها .. وشكرت مودي الولد الذكي اللي أخذ باله من الموقف وعرف يتصرف كويس هو ومامته وباباه وانقذوا البنوتة ورجعوا لمامتها .. والأمن سلم الست الغربية اللي كانت ها تخطفها للبوليس عشان تأخذ جزائها.

حدوتة (٤٩) كنزي والفواكة

الهدف منها توعية الأطفال بضرورة غسل الخضروات والفواكة قبل الأكل

كان يا ما كان .. كان فيه زمان بنت اسمها كنزي .. كنزي كانت بنوتة جميلة ورقيقة .. لكن مشكلتها الوحيدة هي عدم اهتمامها بنظافة الأكل اللي بتأكله أو حتى نظافة أيديها قبل الأكل وبعده .. كانت مامتها على طول تقولها أن كدة غلط .. لازم نغسل أيدينا كويس بالمائة والصابون قبل الأكل وبعد الأكل .. وأنا لازم نتأكد من نظافة الأكل اللي بتأكله ونغسل الخضروات والفواكه كويس أوي قبل ما نأكلها .. وفي يوم من الأيام مامتها راحت تشتري طلبات للبيت من السوق .. وسابت كنزي نائمة .. مامتها أتأخرت شوية في السوق .. ولما رجعت لقت كنزي صحيت وبتفرج علي التلفزيون .. كانت لسه ما فطرتش وجعانة جدا.

جريت على مامتها وقالت لها .. جبتي لي فطار معاكي يا ماما؟ .. أنا جعانة أوي .. مامتها قالت لها أيوة يا كنزي .. أنا جببت لك فطار .. ثواني ها أغير هدمومي وأجي أحضر الفطار .. قالت لها طيب بسرعة يا ماما .. راحت مامتها تغير هدموما .. وجريت كنزي على الأكياس اللي جابتها مامتها عشان تشوفها جابت أيه من السوق .. لقت مامتها جايبة حاجات كتير خضروات وفواكه ولحوم وفراخ وأسماك .. قعدت كنزي تفكر في حاجة تأكلها تصبر نفسها لحد ما مامتها تحضر الفطار.

مالقتش قدامها حاجة سهلة غير الفواكة .. هي أصلا بتحبها جدا .. قالت لنفسها أنا ممكن أكل تفاحة أو فراولة أو عنب لحد ما ماما تخلص الفطار .. لأحسن أنا ها أموت من الجوع .. طلعت كنزي تفاحة وعنب .. ومسكتهم في أيديها ولسه بتفكر وبتقول ها أروح أغسلهم في المطبخ .. وبعدين قالت أنا لسة ها أروح لحد المطبخ وأغسلهم .. أنا جعانة جدا .. وبدأت تاكل التفاحة من غير ما تغسلها .. وخلصتها .. بعدها تاكل العنب .. وراحت تكمل وتتفرج على التلفيزيون .. خلصت مامتها وجت عشان تحضر لها الفطار .. ولما خلصت ندهت لها عشان تقطر قالت لها حاضر يا ماما أنا جاية.

بدأت بطنها توجعها .. راحت لمامتها وقالت لها يا ماما .. أنا مش قادرة أكل .. بطني وجعاني جدا .. ماماتها قالت لها معلش يا حبيبتي يمكن من الجوع بس عشان لسه ماكلتنيش حاجة لحد دلوقتي .. لما تقطري ها تبقي كويسة .. قالت لها بصراحة يا ماما أنا أكلت تفاحة وعنب من غير ما أغسلهم .. أنا عارفة أنك على طول بتقولي لي أن دة غلط .. بس أنا كنت جعانة ومش قادرة فا أكلت .. أه يا بطني مش قادرة يا ماما .. مامتها حسبت أن كنزي كدة في خطر .. خدتها بسرعة على الدكتور وحكيت له على اللي حصل .. الدكتور فهمها أن الفواكة والخضروات لازم يتغسلوا كويس قبل ما ناكلهم .. لأنهم بيتزرعوا في الأرض يعني في الطين وبعدين المزارع بيرش عليهم مواد ومبيدات عشان تقتل الحشرات وماتخيلهاش تقرب من المحصول بتاعه وتبوظه.

دة غير أنه بيمسكها بأيديه عشان يقطفها ويحطها في العبوات اللي بيبيعها فيها .. وكمان أيد البياع اللي في السوق اللي بيمسكها عشان يفضيها في المحل بتاعه ويبيعها وطبعا أيديهم بتبقي مش نظيفة .. كمل الدكتور كلامه .. تخيلي يا كنزي كمية الميكروبات والجراثيم اللي ممكن تكون فوق التفاحة والعنب اللي أكلتيه من غير غسل .. أنتي محتاجة مطهر معوي بسرعة وعلاج للمغص والتقلصات .. ضروري تاخديه في ميعاده .. وأن شاء الله ها تبقي كويسة.

كانت كنزي بتسمع كلام الدكتور وهي بتتألم من وجع بطنها .. واستحملت وأخذت العلاج على الرغم من أن طعمه وحش .. إلا أنها أخذته من غير ما تتكلم لأن ماقدماهش حل ثاني ولأنها اللي عملت في نفسها كدة .. ومن ساعتها أتعلمت كنزي أن نظافة الأكل اللي بناكله حاجة ضرورية ومهمة .. وأن الخضروات والفواكة لازم تتغسل كويس جدا قبل ما ناكلها .. حتى أيدينا لازم نغسلها كويس قبل الأكل وبعده.

حدوتة (٥٠) يارا تحب السهر

الهدف منها توعية الأطفال بضرورة النوم المبكر وتجنب عادة السهر

كان يا ما كان .. كان فيه زمان بنت اسمها يارا .. يارا كانت بنت جميلة ومؤدبة .. لكن عيبتها الوحيد أنها بتحب السهر ومش بتنام بدري .. طول فصل الصيف عشان مافيش مدرسة .. بتفضل سهرانة طول الليل .. ومش بتنام غير لما النهار يطلع والشمس تظهر .. مامتها كلمتها كتير وقالت لها كدة غلط يا يارا لأن ربنا خلق الليل عشان ننام فيه وخلق النهار عشان نشغل فيه ونخرج ونعمل كل اللي أحنا عايزينه .. لكن يارا كانت على طول تقولها بس أنا يا ماما مش بحب النوم دة .. عايزة أسهر طول الليل ألعب وأتفرج على التلفيزيون لحد ما الشمس تطلع وتنور الدنيا وأبقى أنام.

ولما قربت أجازة الصيف تخلص وتبدأ الدراسة .. طلبت مامتها منها أنها تظبط نومها بقي كدة ما ينفعش .. لأنها لازم تصحي بدري وتروح المدرسة وتنام بدري .. لكن يارا رفضت تسمع كلام مامتها .. وفضلت تسهر بالليل

وتنام الصبح .. لما مامتها تيجي تصحيا عاشان تروح المدرسة .. فضلت تعيط وتصرخ عايزة تكمل نوم لأنها بتنام متأخر وما بتبقاش لحقت تنام أصلا .. كانت مامتها بتقومها من النوم بالعافية وتغسل لها وشها وتلبسها وتودبها المدرسة .. وأول ما توصل يارا للفصل بتاعها .. تحط دماغها علي الديسك بتاعها وتنام في مكانها .. استمر الوضع على كدة لفترة.

لاحظت مامتها أن مستواها الدراسي قل جدا بعد ما كانت متفوقة .. ودة لأنها بتروح تنام في المدرسة ومش بتركز في دروسها .. يارا اتضايقت جدا من نفسها لما لقت أصحابها كلهم أشطر منها .. وبيركزوا في الشرح مع المدرسة وبيجاوبوا معاها .. مامتها قالت لها يارا يا حبييتي .. أنتي السبب في كدة .. أنتي اللي بتحبي السهر .. وأنا قولت لك كثير قبل كدة .. أن دة غلط .. لازم تنامي بدري عشان جسمك يستريح .. وتقدري تصحي الصبح للمدرسة نشيطة وفايقة .. وتركزي في مذاكرتك ودروسك .. لأن كمان في حاجه اسمها هرمون النمو دي اللي بتخلي جسمنا يكبر ويطول ما بيشتغلش في جسمنا غير لما بنام بليل.

كملت مامتها كلامها وقالت لها .. يعني كدة أنتي مش ها تكبري أبدا .. حسيت يارا بغلطها .. وقررت تغيير نظام نومها خالص .. وتسمع كلام مامتها تنام بدري عشان تصحي بدري نشيطة ومركزة .. وبالفعل لما غيرت نظام نومها بقيت بتروح المدرسة فايقة وقادرة تركز في شرح دروسها .. وبقت متفوقة زي زمان .. ووعدت مامتها أنها ها تفضل تنام بدري .. وتصحي بدري طول أيام السنة مش بس في أيام الدراسة وفي أجازة الصيف كمان إن شاء الله.

حدوتة (٥١) سرير سمير

الهدف منها تشجيع الأطفال على النوم في غرفتهم الخاصة بهم

كان يا ما كان .. كان فيه زمان ولد جميل اسمه سمير .. سمير دايمًا بيخاف ينام في سريره لوحده .. وكان على طول يطلب من مامته يا أما تنام جنبه في سريره يا أما يروح هو ينام جنبها في سريرها .. مامته أتكلمت معاه كثير أن كدة غلط .. وقالت له بص يا سمير زمان أنا كنت بنام جنبك لأنك كنت بيبي صغير .. وكنت بتصحي كثير بالليل عشان بتبقى جعان .. وعايز ترضع أو عطشان أو محتاج أغيرلك الحفاضة .. لكن دلوقتي أنت كبرت ول لازم تنام في سريرك لوحدهك .. كان سمير يفضل يعيط ويقول لها أنا خايف يا ماما .. مش ها أعرف أنام لوحدي .. ولو قعدت مامته جنبه على سريره لحد ما سمير ينام وتيجي تقوم تروح أوضيتها .. يتخض سمير ويصحي ويجري بسرعة على أوضه مامته.

وفي يوم من الأيام جت جدته عشان تقعد عندهم كام يوم .. فرح سمير جدا وقال لها الحمد لله يا تيته .. حضرتك ها تنامي جنبي في سريري .. أحسن أنا بخاف أنام لوحدي .. استغربت جدته وسألته معقول يا سمير في السن دة؟؟ دة أنت يا حبيبي كبير؟ بتخاف من أيه؟ رد سمير وقالها بخاف من الوحوش وبفضل أحلم أحلام وحشة أوي كل ما أغمض عيني .. سمعه باباه رد وقال له يا سمير يا حبيبي ما فيش حاجه اسمها وحوش .. وبعدين مش أنا قولت لك أنك قبل ما تنام يا ريت تتوضى وتعمل خطوات الوضوء اللي الميس علمتها لكم في المدرسة .. بصيت له جدته وقالت له طيب أيه رأيك يا سمير .. أنا ها أقولك على طريقة مش ها تخليك تخاف من حاجة ولا تحلم بأي حاجة وحشة خالص.

رد سمير بفرح وقال لها .. بجد يا تيته .. قولي لي بسرعة أية هي الطريقة دي؟ .. قالت له تعمل زي ما سيدنا محمد عليه أفضل الصلاة والسلام كان بيعمل .. أول حاجة تتوضى قبل ما تنام زي ما بابا قالك كدة .. ثاني حاجة بعد ماما ما تحكيك الحدوتة تنام علي جنبك اليمين .. وفيه دعاء حلو أوي لازم تقوله قبل النوم .. باسمك ربي وضعت جنبي وبك أرفعه .. ردد سمير ورا جدته الدعاء .. باسمك ربي وضعت جنبي وبك أرفعه .. الله دة سهل أوي يا تيته .. ها وبعدين .. كملت جدته وقالت له .. وبعدين بقى تقول في شرك أي سور قصيرة أنت حافظها من القرآن .. وبكدة ربنا ها يحفظك .. وهتحمس نفسك أنك مطمئن ومش خايف خالص ومش هاتشوف وحوش خالص.

وبعدين بقي تغمض عينيك .. وتتخيل نفسك كأنك شايف نفسك موجود في أحلي مكان أنت بتحبه النادي مثلا أو المدرسة مع أصحابك أو حتى على شاطئ البحر .. وبتلعب مثلا مع أكثر ناس أنت بتحبهم باباك ومامتك أو أختك أو أصحابك اللي بتحبهم .. هاتلاقي نفسك روح في النوم وها تحلم كمان أحلام جميلة أوي .. وهاتصحى الصبح مبسوط جدا ونشيط.

ابتسم سمير وقال لها الله يا تيته .. دي فكرة حلوة أوي .. أنا ها أجربها النهاردة إن شاء الله .. اتبسبت مامته وباباه أوي منه وقالوا له برافو عليك يا سمير .. أخيرا ها تنام لوحده في السرير .. ضحكت تيته وقالت لهم من النهاردة سمير هينام لوحده في السرير .. وأنا كمان ها أنام في الأوضة الثانية لوحدي.



iCulture